

光緒重修安徽通志

重修安徽通志卷一百七十九

人物志

宦績二

安慶府

張涪字希古桐城人隆慶戊辰進士知永康縣素多姦黠健訟涪至判決如流吏民駭服凡斷訟片晷分析鄉民裹飯一包卽可了事因呼爲張一包又謂其敏如包拯也巨盜盧十八剽庫金十餘年不獲御史以屬涪涪刻期三月必得盜及擒十八報御史僅兩月耳民有睚眦嫌輒以人命訟涪驗無實卽坐之自是無誣訟者歲旱嚴禁劫奪有奪五斗米者涪佯取死囚杖殺之而榜其罪曰是劫米者眾皆懾服累官浙江副使時議散浙東召募兵兵皆洶洶請汰其老弱畱其壯勇則可免亂從

之遂定官終陝西布政

明史本傳

王嘉柔字惟則潛山人隆慶辛未進士知從化縣地僻南徼椎埋自雄小民荼苦罔告嘉柔撫字惟勤時劇盜萬尙興倡亂地方搖動嘉柔設計擒之民德焉以災方勞瘁卒官

江南舊志

劉尙志字士行懷甯人隆慶辛未進士知歸善縣再補山陰兩

邑有神君慈母之稱以薦入諫垣張居正柄國繩下嚴尙志上緩刑一疏鄒元標以劾奪情獲罪抗疏救之尙志本出張之門不顧也歷江西少參浙江海道選將練兵爲防倭計甚悉遷福建觀察轉山東左布政致仕歸尙志性孝葬父躬壘負石墓木生連理人稱孝感

江南通志

韓棟字遡高懷甯舉人知江夏縣簡素不媚上官張居正甚重之臺司因而延譽張公子省試出有陳臬者爲張宴於黃鶴樓

有簾坐三主辦者貸於紳家公子登而屢顧之陳使人告棟令買其全以獻棟不應陳自出重資強棟轉乞之棟即日解冠上官皆留之不得

江南舊志

吳傳字士悅桐城人以貢知寶慶縣清潔自守令譽皦然歸使擔竹簾過太守見之問何物傾之僅檀香楂數升守爲歎息久之

安慶府志

吳承恩字本賜桐城選貢知河陰縣黃河南徙民患之承恩禱於神河忽北去四十里令民於其壩築隄植柳數十萬耕牧其中遂成沃土後大饑民剝柳膚爲食曰此吳公活我柳也遷判潞南父老攜錢爲贐承恩曰昔劉寵受民一錢吾不逮劉乃取二錢受之

安慶府志

韓選字惟賢桐城舉人官定州知州政務利民不避權勢畫奇

捕盜民賴以安

安慶府志

吳江字元濯宿松人萬曆七年知崇義縣開狗腳嶺路建朝天

關修學宮御史陳炯記之

江西通志
新增

盛世承字以烈桐城人萬曆丁丑進士以部郎出爲按察司副使備兵大同時邊事旁午世承馭以鎮靜威信所至西人懽服轉陝西右布政蘭州機戶疲於貢絨世承力蘇之調四川左布政會有事於播播平又爲善後策蜀人賴之病免再起以原官備兵陝西按部墾河灘荒地千餘頃爲秦中世世利後爲光祿卿以璫禍削職崇禎初起原官卒年八十八

江南通志

劉坤字擇華懷甯舉人官荊州推官風裁凜然有溫御史之稱後以議江陵奪情爲所計遂告歸

安慶府志

盛世翼桐城進士萬曆中知樂安縣戊子歲大饑首捐俸賑之

親至各鄉勸義得助千石者六家數百石者無算民賴以生修學均徭一清如水百姓至今思之

江西通志
新增

任可容字子賢懷甯人萬厯丁丑進士授中書舍人轉工部員外出知處州理民閒利病如家事屬邑有以香蕈進者中匿金以嘗之懲其解役遣去轉惠潮道兩屬皆海防重地嚴飭武備壁壘改觀遂一敗倭於碣石再敗倭於南澳有出海船三十餘隻稱係總督家人可容盡逮而置諸法南澳獲洋商五十四人總督誤以爲賊力白其冤盡釋之尋轉本省鹽屯道以勞瘁卒

於官

江南
通志

容若玉字崑石懷甯人萬厯甲戌進士知晉州多善政創建書院進諸生講道論業燕趙之閒彬彬有齊魯風焉升江西嶺北道值岑賊嘯聚廣中和平諸境聲言奔贛會撫道俱遷去玉以

一人攝藩司篆兼程假節鉞鎮之出兵大龍以保要害因檄嶺北共截其歸路遣謀者火其巢賊失據一戰縛之以積勞成疾

卒

江南舊志

葉隆光字朴齋懷甯人萬厯庚辰進士知閩縣愛民如子入爲吏部驗封主事轉員外郎本姓聶至是請復姓焉尋同萬國欽鄒元標疏請早定國本削籍家居杜門光宗立詔求當日言事諸臣而隆光已卒贈太僕寺少卿

江南通志
安慶府志

吳彥之懷甯人萬厯閒福建歸化主簿愛惜小民不輕鞭朴不取紙牘有吳菩薩之稱

福建通志
新增

汪道亨字雲陽懷甯人萬厯癸未進士授戶部主事出守泉州泉人稱爲恩父累遷廣東布政使平欽州賊有功入爲應天府尹特疏請增科額尋以右副都御史巡撫宣府繕修亭障撫輯

邊人塞上無警卒贈兵部尙書

一統志

方大美字黃中桐城人萬厯丙戌進士授常德推官廉潔愛民政多卓異擢御史巡按江西抗稅璫飭吏治尤加意士風造就甚眾轉按河南中州大旱捐俸賑荒全活萬人終太僕寺卿

一統志

徐堯莘字賓嶽潛山人萬厯丙戌進士由戶部主事出知永州鞭朴不施郡中大化歷荊州知府中官陳奉開礦沙市掘冢踏室道路以目莘約其騶從不得逞大帥劉綎征播調兵數省途出於荆民爭避之莘爲經紀信宿地民獲安堵神宗嘉其勞賜以銀卮歷廣東按察使廣西布政使司

一統志

楊材字述生懷甯人萬厯己丑進士知漳浦縣歲歉親核貧民給其食凡不便於民者力請蠲之漳民訟曲者多食斷腸草乃

令不直者許焚草以代餉金民多全活入爲戶部主事給散京城各衛軍餉秉公無私遷吏部考功以執法忤當軸遂歸光宗

立起太常卿轉左通政

福建通志
江南通志

吳用先字體中桐城人萬曆壬辰進士知臨川縣均賦便民民懷其德擢戶部主事歷官浙江左右布政晉都御史撫蜀時播酋亂大將劉綎以議餉未進用先躬帥師先之督綎等合戰戮力剿撫數月蕩平尋謝病上憫其勞特賜考績予告家居八年起少司空改樞貳總督薊州建防禦十策殫力籌畫會璫禍起

致政歸

江南通志
安慶府志

金忠士字麗陽宿松人萬曆壬辰進士知樂平縣

舊志

英敏有德

威治務整大綱不苟繁瑣建麗陽書院修舉廢墜建置橋梁

江西

通志擢御史劾奸弁袁守時中貴邢隆立寢徵稅銀一十五萬

新增

江南民獲更生巡按貴州浙江河南三省定水西平路苗降思
南賑荒平獄招撫流移以劾潞王不法事忤旨出爲福甯參議
遷榆林副使會濟農索金幣犯邊忠士擊敗之擢僉都御史巡
撫延綏奏行籌邊七議威名大著卒贈兵部右侍郎子星耀蔭
錦衣同知魏璫用事乞假歸崇禎時起官上止殺疏莫不傳頌

一統志

胡瓚字伯玉桐城人萬厯乙未進士授都水司主事分司南旺
兼督泉閘駐濟甯泗水所注瓚修金口壩遏之河決黃堦運道
堙阻瓚贊總理河漕劉東星濬賈魯河故道益治汶泗閒泉數
百引漕甚便又督修琉璃河橋三年橋成省費七萬擢江西左
參政告歸

明史劉東星傳

何如寵字康侯桐城人萬厯戊戌進士由翰林歷祭酒至禮部

右侍郎因與左光斗同里友善奪職歸崇禎初起禮部尙書宗藩婚嫁例請於朝貧者爲部所稽白首不能完家室用如寵請嫁娶者六百餘人京師戒嚴桀黠者請以私財聚眾助軍朝議壯之如寵力言不可帝偵之與如寵言合由是受知晉東閣大學士帝欲族袁崇煥以如寵申救免死者三百餘口稱病乞休疏九上乃允卒贈太保諡文端

明史本傳

何如申字仲嘉如寵兄也與如寵同舉進士官戶部郎中督餉遼東有清操軍士請復畱二載終浙江右布政使

明史何如寵傳

吳承顏字錦崖桐城人以明經謁選補建安丞凡陋例羨金一切謝卻攝崇安建安壽甯三邑皆有廉聲乞休歸惟圖書數卷足不入城市

安慶府志

江之湘字楚望桐城舉人司鐸江陰遷我嶠令有兩生以父仇

誣陷瘕獄立雪其冤地有白鶴潭民病涉之湘捐資填泊水患

以息至今稱江公潭邑祠祀之卒年八十五

安慶府志

劉鉦字子堅懷甯舉人授紹興府判值湖藩以兵荒乏賑廷議

浙省運銀濟之鉦承委部運既輸官餘耗千金歸盡還之省省

使驚歎

安慶府志

胡士奇字易礎桐城舉人知黃州多善政升姚安知府殫心教
養會黔蜀交訐晝夜經畫竟保無虞以疾歸居官未久而惠政

偉績所至人皆頌之

安慶府志

馬孟禎字泰符桐城人萬曆戊戌進士知分宜縣廉惠得民秩
滿將內召以徵賦不及四分被劾鐫秩民間其獲譴爭先輸納
甫三日逋悉完授御史疏陳通鑿蔽錄直臣決用舍恤民窮急
邊餉五事怡神殿災陳時事可慮者三皆不省孟禎遇事敢言

其持議嘗與黨人相搢拄深爲所忌遂出爲廣東副使天啟初

起太僕卿爲魏黨所劾削籍崇禎時復官

明史本傳

姚之蘭字汝芳桐城人萬厯辛丑進士知海澄縣開九都水利
化斥鹵爲膏腴居民德之名其地曰姚港升杭州知府訟無留
獄接士以禮去之日郡人立德馨祠於吳山及西湖兩處又知
汀州適朝議加餉乃搜府庫藏所餘者佐以贖羨新餉五千金
完如額不以累民將超擢以母老乞養歸上嘉其急公愛民晉
秩副使以榮其歸焉

浙江通志
江南通志

劉允昌字燕及桐城人萬厯甲辰進士知宜黃縣調臨川不畏
強禦摘奸發伏如神遷廣濟多決疑獄他邑質成者畢聚江隄
久圯改築之益廣且堅邑民素苦漕運爲條陳上直指得減半

折兌以疾卒官

一統志
湖北名宦

馬人龍字霖雨太湖人萬曆甲辰進士授戶部主事以犒邊奏績權稅潯江賈人德之爲立祠焉升黃州守調武昌轉本省督學副使校士公明眾論肅服以艱歸起補三關兵備轉桂林道苗猺大訐人龍修戰艘繕城郭禦之歷湖廣右布政引疾乞休

歸

江南通志

吳應琦字景韓桐城人萬曆甲辰進士擢御史巡按雲南值兩鎮並建貢金驛騷應琦奪鎮印於其子以還其父又力言滇方遠苦請免貢金之半諸明經應貢者苦萬里裹糧特疏免其廷對就試本省滇士尸祝之尋補浙江道按順永保河諸瑄相戒勿犯累官南大理卿致仕歸年八十餘卒

江南通志
安慶府志

方學御字明卿桐城人以貢官廬州教授郡守聞其清操以疑獄屬之執法剖決不可干以私除知臨湘縣以德化民不任刑

罰尤崇獎學校延進賢俊庭論經史詢利弊卒於官貧無以斂

紳士致賻襄事

安慶府志

姚之騏字渥源桐城人萬厯丁未進士知湘潭縣性剛直政務利民尤加意學校勤於課士湘民有只喫湘潭一口水不染長沙半點泥之謠卒於官貧無以斂監司王志遠爲經紀其喪

湖南志

通志

倪應春字申之桐城人萬厯丁未進士知上杭縣擢御史敷陳皆軍國重計光宗賓天引春秋不嘗藥正紅丸之罪李選侍移宮羣議鼎沸乃上仁義兼盡之疏及楊漣去國復抗疏保畱一時歎其正直晉太僕卿瑞禍起削奪同籍

江南通志

任國楨字士彥懷甯人萬厯庚戌進士授戶部主事督淮安稅務鈔溢五千悉解內帑遷知袁州袁故多盜楨集百姓訓戒有

犯者令其父兄自治期年荏苒無警擢山東兵備京師戒嚴振

旅入援上嘉其忠特簡楚臬以母老乞歸

安慶府志

何早字白夫懷甯人萬曆癸丑進士知海鹽縣縣市肆有門攤商稅派多失均核而差等之因大蘇行鹽票多至六千滯正引早請減票二千鹽課以足擢御史巡視下江適璫李明道督淮漕建議民運早力陳其不便削籍去崇禎初銓部交薦奉有餽直端方之旨賜還里

浙江通志
江南通志

方大鉉字君節桐城人萬曆癸丑進士授刑部主事張差獄起同官王之案欲窮治其事大鉉泣而止之保全甚眾以艱歸廬墓三年起補戶部卒於官

安慶府志

吳善謙字伯亨桐城舉人任台州推官俗佻難治兵以餉不時給每羣譟謙既任事兵民安輯崇禎初擢御史上求治方殷善

謙首贊實政上甚嘉之

安慶府志

盛可藩字屏之桐城舉人授龍泉教諭升主事督運通州禁革陋規又督運昌密二鎮邊糧如期報完以瘁成疾卒於官贈光祿少卿

安慶府志

齊琦名字越石桐城人萬曆癸丑進士授大理寺評事以明恕稱典試蜀闈甄錄皆名士轉戶部清屯糧二萬餘出守紹興清

白自矢致仕歸

安慶府志

黃文星字辰北潛山人萬曆癸丑進士知同安縣甫越月颶風

發民居幾盡文星經紀年餘盡復其廬舍調清豐治績益著擢

駕部郎以瘁卒官櫬歸行李蕭然

江南通志

李載圃字東梧太湖人以貢授東平州同知人莫敢干以私治

聲大著委查各縣所至慚懾

安慶府志

吉以升字南階太湖人以貢知浦江縣有善政民稱曰子路重

來弟以復守鄜州亦稱能吏時謂二難

江南舊志

陳所學字載揚太湖人以貢授鎮江教授升隆平知縣歷安甯

知州革火耗崇學校歲歉捐俸施粥全活甚多厝道殣立義館

惠政不可勝紀上官咸稱爲清廉第一卒年八十餘

江南舊志

章以逢太湖舉人知淇縣仁惠有聲民頌爲章母尋乞休卒邑

人祀之瞽宗

安慶府志

李廷柏字三望望江舉人授太安學正擢知平穀縣縣爲邊徼

飭備安民戶夜不扃

安慶府志

龍子甲字汝成望江人以明經任教職擢知濟陽縣縣苦馬政

歲耗萬金子甲釐其弊民始甦妖賊鄒勝作亂鄰邑無堅城獨

濟陽守禦有方得不破性至孝母徐氏年九十歿居喪猶孺子

泣一統志

石汝瑩字琇夫宿松舉人授沔陽知州載薪米赴任曰吾所飲楚水耳到任修葺學宮優士勤課民無冤獄吏不舞文有青天之譽卒於官祀名宦

江南舊志

汪文偉字純符宿松舉人知崇德縣寬和廉明民尸祝之調靈邱致仕歸同邑楊可晉字麗明以貢授全椒學博勤於造士卒於官臨江酌送者數百人

安慶府志

方大任字玉成桐城人萬曆丙辰進士知元城縣擢御史魏璫墳塋越制特疏糾之削籍崇禎初召復故官升都御史巡關獨出關千里外與總督袁崇煥經畫方略巡撫順天出守通州賊圍城誓以死拒一子甫數齡大任作家書與之訣邏者得之以聞上嗟歎久之圍解遂得疾告歸

江南通志
安慶府志

方孔炤字潛夫桐城人萬厯丙辰進士知嘉定州發奸如神以忤上官調福甯爲建學宮開玉帶池入爲職方郎忤崔呈秀削籍崇禎初起故官以艱歸定桐城民變還朝以右僉都御史巡撫湖廣擊賊李萬慶馬光玉羅汝才於承天入戰八捷時熊文燦納獻忠降處之穀城孔炤條上八議言主撫之誤已而賊果叛文燦乃檄孔炤防荆門當陽孔炤請專斷德黃守承天護獻陵會楊嗣昌代文燦令孔炤仍駐當陽惠王常潤疏言孔炤有來家河神通堡之捷陵寢得無虞請增秩久任章下部未奏而部將楊世恩羅安邦奉調剿竹山寇深入至香油坪而敗嗣昌忤其異已劾逮詔獄予以智伏闕訟冤議護陵寢功多減死成紹興復以薦起右僉都御史屯田山東河北馳至濟南而京師陷南都馬阮亂政歸隱十有餘年而終

一統志福建名宦
明史鄭崇儉傳

吳叔度字勿銘桐城人萬厯丙辰進士授工部主事權杭州南關杭人爲鐫權政上下篇以紀之尋守黃州黃梅盜起氛甚惡叔度曰此烏合易與耳單騎往諭卽解散後再入爲工部卒黃人思其德祀之蘇祠之傍

安慶府志

沈立義太湖人萬厯丙辰進士知樂清縣每至耕斂時輒弛征以紓民力俗尙厚隘至破產生女多不舉立義勸諭之風俗一變有戴生病不能娶出資助之擢戶部主事歷工部轉長沙守長沙轄地廣撫字催科兼得其理以勞卒官

浙江通志
安慶府志

何應奎字任城桐城人萬厯己未進士知吉水縣政尙廉平擢禮部主事歷吏部郎時銓政久壞應奎深心調劑疏冗滯杜苞苴爲時所稱

安慶府志

鄧士美字實卿桐城人以貢知靈山縣入境祭伏波廟有甯爲

保障毋爲繭絲之語政尙簡惠一意撫循引疾歸靈山如失慈

父母卒年九十三

安慶府志

葉燿字太素桐城人以恩貢授武進訓導歷知文高縣清慎如

寒素折獄多平反稱嶺南循吏第一卒年八十二

安慶府志

劉之廣字若颺桐城人以歲貢官蓬州知州署儀隴有惠政民

德之嘗辨江右木商羅殷之冤爲出其罪後殷孫大任成進士

入翰林造廬道謝人始知之

安慶府志

黃朝臣字惟敬潛山舉人官海州學正守廉其賢以征科相屬

素稔民因悉裁羨餘守歸感其誠亦自裁其餘遷麻城知縣未

赴卒

安慶府志

舒鵬字應舉望江人以明經官平湖縣丞署邑篆時值兵荒流

移載道招集勸墾民安其業又捐俸修學多士懷之擢知南海

縣以外艱歸母老遂不出弟塗亦以明經判九江有惠政家居

兄弟相師友並年近八十餘

安慶府志

孫繼陞字我揚桐城貢生萬厯閒授海門訓導請開南關外石
閘旱歲引水入河潦歲洩水出海民利賴之又築利河鎮海隄
期月工竣擢河南項城知縣賑水荒役丁壯濬河擊殺潁州銅
陽城積寇殆盡威惠大著調山東鄆城擊敗朱賊尙營獻策於
河院李若星討平之衰老乞休去官崇禎初以員外郎召不起

桐城縣志

新增

齊心孝字君求桐城人天啟壬戌進士官編修與黃道周倪元

璐齊名

安慶府志

倪嘉善字瓊圃桐城人天啟壬戌進士崇禎時授檢討廷對疏
論君德甚悉朝鮮擅廢其主命草檄討之遷國子司業上幸太

學命講泰卦充經筵日講官時國步艱難以憂勞成疾卒

安慶府志

姚孫渠字石嶺桐城人天啟壬戌進士知龍游縣地產竹樹採買爲患力請停之乃蘇其賦商民相與立祠再補晉江瀕海爲鹹潦所淤居民流離孫渠捐募糴穀以賑全活數萬擢御史章奏悉中時弊彈射不避權貴官至尙寶卿

江南通志

孫晉字魯齋桐城人天啟乙丑進士知南樂縣清驛釋繫戢豪賑饑調滑縣報最擢給事中首劾權相疏凡九上以忤溫體仁左遷大理寺正特疏出劉宗周金光辰於獄宣督乏人上特簡之受命半載徵兵徵餉積勞成疾乞休歸明亡有薦之者辭不出

安慶府志

王揚基字爾抑潛山人天啟乙丑進士歷知錢塘東鄉進賢諸縣治績稱最遷工部主事以艱歸服除從少司馬督剿餉轉楚

驛鹽道以援漢陽有功晉楚撫闖賊陷承天左良玉引師東指
獻賊復連破蕪黃陷武昌揚基率罷卒數百從湖南循袁州繞
彭蠡至江州與良玉軍會涕泗誓師上諭恢復顯陵甲申春率
諸軍大舉循漢川而上聞京師陷以憂卒

安慶府志

左光先字三山桐城人光斗之弟也以舉人知建甯縣擢御史
巡按浙江任滿既出境適許都倡亂反東陽光先聞變疾返命
將擊之連收其所據四邑都退保紫微山紹興司理陳子龍欲
降之光先不可執而戮之福王立馬士英薦阮大鍼光先力爭
大鍼得志逮光先亂亟道阻乃止

明史左光斗傳
浙江通志

黃自泰字體白太湖舉人歷官主事奉差採銅常德不擾民不
病商升湖廣驛鹽道

江南舊志

趙璧字連城太湖舉人知平樂縣歲餼捐資貸賦民賴以安調

慶元循聲益著慶人立祠祀之升建甯同知清餉除盜有功將

題擢遂乞歸年八十九

安慶府志

方九思字心齋太湖貢生官四川布政司經歷署綿州興利除害如謀子孫忘其爲代庖也去任日父老子弟如失慈母乞養

歸

安慶府志

雷永祚字長卿太湖舉人官臨清北徐教諭訓迪有方司理餘杭多所平反解組日行李蕭然同邑尹大勛字淡明以貢官濟陽教諭日與諸生講學不輟人嚴事之

安慶府志

韓一光字麗陽懷甯人崇禎戊辰進士由行人授監察御史時璫燄雖熄二三漏網者尙柄用光疏凡十上列其奸賄流寇猖狂特疏爲皖預增兵餉當事者視爲不急俄賊兵犯境王師敗績出按蜀悍宗大吏爲之凜然後擢大參治兵濟南爲舊効吏

所誣罷歸里卒年八十二

安慶府志

汪游龍字六御懷甯人崇禎辛未進士知鹽山縣地接交趾蠻戶黎人時煽爲亂游龍練兵設餉民賴以安調番禺海寇劉香老入犯當先決戰不避矢石香老就擒擢御史士民號泣遮擁有隨舟數百里者按閩值黃道周以劾楊嗣昌被謫力疏救之卒於官僚屬往斂惟做衣數襲而已

江南通志

戴昶字無睢懷甯人崇禎辛未進士授工部主事詔修都城程物量工如治家事皖苦兵燹上疏請蠲轉濟南道土寇李雲焚掠無忌練兵堵截殲其渠魁寇平轉山西提學道卒於官

安慶府志

汪國治字君酬桐城人崇禎辛未進士知閩縣愛民如子革火耗免羨餘調揭陽海氛先熾嚴保伍勸農桑一邑帖然奏最擢戶部主事督運通橋以功升郎中除山東兵備參議歲饑殫心

翰濟引疾歸時里中方有寇警卽捐餉登陴爲士民倡會幼子

遇賊害感痛卒

安慶府志

汪大勛字庸廷宿松人以恩貢任龍游丞署開化篆凡應納贖

緩者以貧苦告卽豁除之休致歸中途燬火不繼鄉居蕭然年

八十餘卒

安慶府志

高宏量字心完宿松人以貢歷處州教授正士習培士氣處守

陰揭一士挾之取印堅不肯從守怒逕申之以無學篆遂寢處

士深德之初皖人任可容守處民立生祠祀之至是以宏量配

安慶府志

石尙貞字載素宿松人官膠州判累擢蒼梧令兩臺有疑獄悉

委代鞠以入覲卒於里

安慶府志

光時亨字羽聖桐城人崇禎甲戌進士知榮昌縣治聲丕著擢

刑科給事中疏言有銓政始有人才有政事始有財用人傳誦之李明睿建議親征爲南遷計時亨疏言平禍亂在安定人心今一城洶洶不爲城守計皆明睿一言誤之京師陷時亨南歸馬士英謂其阻南遷殺之

安慶府志

倪祚善字永錫桐城人以貢知永興縣洞寇猖獗繕甲厲兵寇不敢犯遷判岳州岳陽樓東有白煙一綫上冲霄漢三日不絕訛言城將災祚善肅禱請以身代煙卽息補金華同知許都倡亂首犯金華祚善力爲保障亂定誅其渠魁寬嚴得宜以功升

處州知府

浙江通志
安慶府志

左光明字允之桐城人以選貢歷官武平知縣地疲瘠軍民雜處光明革羨恤獄解懸繩峯官田之累武民大蘇羣盜竊發置社倉練鄉兵建營橋爲守禦計他如造士賑荒罷礦役毀妖樓

皆偉績解組歸年七十八卒

安慶府志

顏渾字伯通懷甯人崇禎庚辰進士授吏部稽勳主事改文選主事澄敘流品門庭闐如嘗憤要津持銓司短長乃倣范仲淹百官圖將除授淺深分注小冊遇有屬託卽發冊示之見者慚沮升員外郎告歸

江南通志

宣國柱字若木懷甯人崇禎庚辰進士擢兵科給事中經國大務章十餘上皆允行然不避嫌怨卒以讒下獄詔再鞫始獲昭

雪以母老乞歸

江南通志

姚孫渠字戊生桐城人崇禎庚辰進士知蘭谿縣南米最爲蘭困自邑達壩數千里力請改折蘭永賴之調東陽許都倡亂揅城無兵突發陷城孫渠馳走深山招集義勇乘元旦賊懈掩擊之遂收復城池誅斬無算旋命家置火器戰具以守賊復來寇

手射卻之蘭谿東陽縣志

璩伯崑字山甫桐城人以副貢知武甯縣邑西柯源洞居人出沒無常舊設銅鼓營以鎮之伯崑孚以誠信頑梗悉化又爲均賦清畝定畫一之徵民食其利巨盜熊元化累捕不獲至是自首曰我不惜一死累賢侯也擢御史引疾乞歸

安慶府志

錢孔芳字含仲桐城人以明經授蕭山學博署邑篆夜夢持斧人跪乞命晨見一尸浮泮水池素與河通意漫流所入召匠合木爲瘞視匠斧有血憶夢語執訊之卽其所手刃一邑稱神明

安慶府志

方象賢字廣野桐城人以貢授黃州判督糧剿寇有功升高州府海防同知復以逐退狼寇功轉廣州府同知歷兵備副使

安慶府志

蔣臣字一个桐城人崇禎時舉賢良撰足國三議議漕屯及鈔甚悉范景文倪元璐前後皆薦之授戶部司務明亡自經爲人所救遂閒道歸史可法鎮淮爲策淮上情形數事史欲以監軍薦固辭歸里鬱鬱而卒

安慶府志

陳文顯字微之太湖人崇禎甲戌進士知南城縣宗藩橫甚文顯以法繩之不敢逞艱歸起補雷州推官治獄平反雷人立祠祀焉擢工部主事道聞京師陷拊膺慟哭旋里隱居

國朝順治中累薦不起時年僅四十餘也著有率素齋詩文行世

安慶府志 舊志隱逸新移

雷縉祚字介公太湖人崇禎十三年帝思破格用人號庚辰特用縉祚以舉人得刑部主事首劾楊嗣昌六大罪可斬鳳陽總督朱大典安慶巡撫鄭二陽河南巡撫高名衡山東巡撫王公

弼宜急易十五年備兵武德疏劾督師范志完縱兵淫掠召對
平臺侃侃直陳乃誅志完而令續祚還任尋以艱去福王立於
南京馬士英以續祚及周鎮曾主立潞王議令朱統鑣劾姜曰
廣因及鎮續祚請悉置於理遂令逮治同賜自盡故事小臣無
賜自盡者以左良玉兵東下故阮大鍼輩急殺之

明史姜曰廣傳

倪藻字華陽懷甯人以貢官達州判蓬民素黠藻孜孜迪之以
善駁多向化以勞卒官

安慶府志

江夢鶴字懷天懷甯舉人署泰興教諭程士有方晉信州同知
時流寇擾攘按戚繼光練兵法勒部選材以儲可用屢署劇邑
故上饒玉山鉛山咸以威惠著聲然屬精官守卒以刷清漕弊
爲貲郎所中遂決計歸同邑汪鉉字以玉以舉人署高淳教諭
多所造就後成崇禎癸未進士授行人

江南舊通志
安慶府志

王之慶字修祐望江人以貢知尤溪縣政成卓異因親老致仕
流寇披猖之慶糾集鄉人立社保聚既沒與左光斗雷縉祚並

祀曰三賢祠

江南通志

宋儒字文卿望江人官錦衣衛千戶典告密儒性廉惠死獄必
求其生囚故無藉臥輒僵死儒奏以牧象草藉之繫者缺食又
奏以無主盜賊食之遂定爲例後鄰連不戒於火焚燬略盡儒
家獨存蓋陰德之報云

江南通志

左國柱字碩人桐城人光斗長子光斗死璫禍國柱重繭數千
里具血疏伏闕號冤得昭雪復官國柱後以副貢令浙之武康
邑白糧久爲屯丁侵攬勒索無休國柱力請官兌民困乍蘇如
出湯火至今頌之

安徽府志

周夢蓮字仲濂桐城人官平陽主簿鳳浦江埭歲以潮嚙傾圮

大爲農患當道委夢蓮往治之躬督畚鍤埭堅患息後移金鄉城當海口歲遭颶風將就圯夢蓮出獨智經畫板幹工役三月城成吏之能而敏者稱首焉

桐城縣志

方可選字贊明望江人以明經授壽昌學博兩署邑篆邑多山寇出沒民人駭散可選招徠撫輯申保甲以相糾覈招鄉勇立團聚以相守望奸宄無所容士民復業以病乞休士民泣送至境

安慶府志

龍應鼎字禹九望江人官海門學博時總兵官鄭芝龍重兵壓城勒輸金二萬令與尉俱逃應鼎獨入鄭營長揖不拜芝龍奇之畱飲盡歡旋撤師去沿海數百里賴之以安以母老乞養歸應鼎性孝少嘗刲股愈父疾鄉饑設粥作賑鬻產糴米以爲之

倡全活者無算

一統志
安慶府志

吳德操字鑑在桐城人以黃道周薦授福建長汀知縣入粵以瞿式耜薦擢監察御史會劉承允擅柄挾桂王之武岡德操爭之承允怒逼王予杖再起御史至大理寺丞轉徙艱難備嘗荼苦而直節益著遂卒於粵

桐城縣志

重修安徽通志卷一百八十

人物志

宦績三

安慶府

國朝方拱乾字肅之桐城人前明崇禎戊辰進士官庶常歷升少詹事充東宮講官經筵日講順治初江督馬國柱薦起補宏文館學士尋除少詹事會上疏數千言多切時務與修大訓等書爲忌者所中蒙

恩賜歸

安慶府志

張秉貞字元之桐城人前明崇禎辛未進士歷官蘄黃江防道時流賊踞楚中躬擐甲胄晝夜視師賊不敢逼內召陛見疏陳戶曹七事擢順甯道平五馬賊以艱歸服除起都御史巡撫浙

江知天命有歸安戢人民部署版籍以待

主師浙西傳檄而定兵民安堵授禮部儀制郎歷官刑部尙書治獄
持平解枉釋滯改兵部運籌軍國以勤勞卒於官諡僖和

江南通志

府志 安慶

馬之瑛字正誼桐城人前明崇禎庚辰進士知陽江縣以廉卓
徵順治初總督馬國柱薦出佐長蘆鹺幕遷知定陶縣值李化
鯨陷城後民物凋弊之瑛招集拊循漸復其舊邑以僞印事株
連數百委曲移訊無辜盡釋又盡革陋例均濱河夫柳之役陶
地多豪右侵占之瑛丈實匿地二千餘頃豁免空糧爲陶永利
擢兵曹主政以勞卒官陶民至今思之

一統志山東名宦

劉餘謨字良弼懷甯人前明崇禎癸未進士順治初授刑科給
諫凡經國要務疏展千言以病乞歸

江南舊通志

張清議字君賀懷甯人前明崇禎癸未進士順治初勘荒江上
又督鑄寶泉搜其利弊立有條法永以爲例尋備兵瀧水獐狽
反側乘風雨夜擊之一戰擒其渠魁量移川北西山寇發清議
總攝軍務崇朝滅賊民不知有兵引疾歸蜀人建祠祀之卒年
七十七子超方順治己丑進士知整屋縣有治聲

安慶府志

姚文然字若侯桐城人前明崇禎癸未進士授翰林明亡閉戶
自經以救甦順治初擢禮科給事中康熙中掌印工戶二垣銳
意建白彈劾不避權貴如疏請創設直隸晉豫總督彈奏撫委
用私人糾憲臣二十餘人之溺職而請寬大臣提解一疏尤爲
得體他如請免四川湖廣江西浙江江南五省採辦楠木之害
論朝審重囚之酌予勾除錢糧考成之分別開復皆關國計民
生擢左副都御史升刑部侍郎充會試總裁官得韓葵爲第一

升刑部尚書理冤清滯校閱爰書恆至夜午年衰有疾諸子諫之不聽嘗曰刃殺人於一時例殺人於萬世其可忽乎卒於官諡端恪雍正八年

詔祀賢良祠

一統志

王大初字以介桐城人順治丁亥進士官翰林編修因病乞休家居九載起爲江右參政督視漕務悉革陋弊停差下州邑而一紙慰諭通問僚屬藹然如家人而急輸恐後期會無愆公暇課士論文春風滿座時有冰鑑之目

江南舊志

程芳朝字其相桐城人順治丁亥榜眼授編修歷官太常寺卿視學畿輔絕去竿牘獎拔寒素奉使安南馳驅況瘁宣暢威德遠人爭賦詩送芳朝亦答和以爲榮性嚴介不肯依附遂移疾

歸

江南舊志

方享咸字吉偶桐城人順治丁亥進士知獲鹿縣察奸戢盜有聲調麗水築好溪堰通濟堰田無旱潦利及鄰邑擢主事升郎中恤刑湖廣江西多所矜豁

世祖章皇帝召入禁內作書各一幅授陝西道御史未久罷歸

安慶府志

何采字敬輿桐城人文端如寵之孫以江甯籍成順治己丑進士由庶常歷侍讀文章翰墨爲一時詞臣之冠

世祖章皇帝嘗比之蘇軾氣節高峻不諧於時以疾歸

安慶府志

潘士璜字鳴瑕桐城人順治己丑進士知東陽縣時寇氛未靖總兵馬進寶駐劄金華防弁攘奪民甚苦之士璜力請當道連罷數員民賴以安

安慶府志

吳道觀號達田桐城人順治己丑進士知商水縣性本慈愛政尚寬平教士勸農一務節儉禁民無得渰女邑產女呼爲桐女

所以報也以最行取不果反中考功議罷歸

安慶府志

彭鏞字孔哲桐城人順治己丑進士時鼎革方新中式者皆擢用鏞氣度從容狀貌魁傑

特簡粵西參議授節鉞擬開府單騎就道理軍務朞月四境懾服駐粵

親王器重欲以巡撫題授固辭晉河南副憲告歸

安慶府志

黃之正字貞子太湖人以貢知新會縣未入境海寇攻城甚急或止其行之正厲聲曰旣奉簡任此卽新會主也安忍秦越視之從閒道入城城值糧絕內籌餉外設備衣不解帶者七十餘日賊始退自是撫綏殘喘招輯流亡民戴之如父母歷太原同知以疾告歸

安慶府志

黃之麟字瑞白宿松人順治初以貢知江西興國縣縣界楚閩粵久爲賊巢之麟招降其渠王大勇擊巨賊孫可貴滅之剽平

梅審洞賊曾拱辰寇亂始息寬免賦額墾田糧二千八百石有奇民深德之敘功紀錄以疾乞歸

一統志

陳登瀛字元卿望江貢生知灌陽縣縣自兵燹後戶口逃散田地荒蕪招徠開墾遂還舊觀升德慶知州以勞卒官兩地皆祠之

安慶府志

金繼望字又呂望江拔貢知宜陽縣兵荒之後招集勸墾民遂樂業擢兗州府管河同知周歷河干修築石香爐梁家樓新月諸隄水患頓息又以餘力賑饑修曹縣學考最晉九江知府九江與望江接壤省墓畢不問家事卽單車就道卻私餽勤吏事以勞卒官

一統志

高文徵字子足潛山貢生知平陰縣到任一月河水沒縣東田數千畝力懇大吏疏請蠲免兵燹之餘重興學校講道課文士

風興起在官僅四月以疾卒士民頌之

安慶府志

汪宗魯字子鳧懷甯人順治壬辰進士知縉雲縣多惠政升知

沁州薪水悉自給民有訟刻木爲皐隸令自拘到立剖之修城及學宮立義冢養濟院沁有劇盜十數輩爲害設法擒獲在官

六年民懷其德終禮部員外郎

一統志山西名宦

陳焯字默公桐城人順治初以拔貢入成均選擢中書制誥多出其手請與秋試遂於辛卯壬辰聯捷授兵部主事念親老乞

養歸親歿廬墓三年

安慶府志

方兆及字蛟峰桐城拔貢授中書舍人甲午膺鄉薦屢遷刑部郎中矜愼詳允贊畫平反多所全活升山東濟甯道地當南北之衝治河決獄供億師旅往來戴星出入目不交睫者六七年

以勞卒官

安慶府志

葉琪字其玉桐城人以貢知洛陽縣時河決金龍口歲議築塞
郡縣供夫運柳爲掃具隄上積若邱山洛距河遠民不堪命琪
爲力請當事柳得折半洛人賴之

安慶府志

倪天樞字臣北桐城人明季流賊逼城建議九條兩上防議事
宜狀俱爲當事所採而危城得固順治癸酉膺歲薦授崇明訓
導捐貲置學田以歲租周士時軍興孔亟天樞督率兵民協守
外新橋營渾暑不避勞瘁卒於官

安慶府志

張超載潛山拔貢任通州訓導與諸生言及其父清雅死難事
未嘗不流涕亦所以教孝也升知慈利縣政先德化以己資修
建學宮邑連苗洞苗多侵民田掠男婦超載單騎入洞宣諭放
還人以千計苗私餽二千金卻之不受歸年八十六卒

湖南通志

慶府志

潘映璽字次魯桐城人明季以貢授台州推官入

國朝擢杭州鹽法道爲忌者所誣下吏浙商千餘人號泣稱冤遂

得免調福甯道政務寬慈士民頌之

安慶府志桐城縣志

姚文烈字覲侯桐城舉人官漢陽推官明允詳慎轉辰州同知

遷楚雄知府地雜民獠文烈撫以恩信人心悅服金山賊伏莽

親馳其營招徠因戢甯之以艱歸士民遮擁車不得前

江南舊志

左國林字鶴巖桐城人忠毅光斗子也以舉人授儀真教授薦

升南雄推官持法平恕不冤一民所活疑獄數十人遷河南同

知未之任卒於官

安慶府志

葉文鳳字紫羽桐城人以貢考選推官改知長興縣多異政歲

旱齋禱惟虔日徒步詣龍井故事磔大血井可興龍文鳳毅然

曰龍神物豈可以犬污遂齧指滴血井中澍雨大沛

安慶府志

戴宏烈字山民桐城人以舉人知成都縣地衝民瘠賦調繇役
軍需儲備往來郵傳頓置皆取給焉宏烈應時立辦民無苛擾
尤加意撫綏歲增戶口千餘墾田數萬頃暇則修舉廢墜如武
侯祠堂浣花琴臺以次修復上官方擬薦而宏烈以勞卒

安慶府志

吳子雲字霞蒸桐城人順治乙未進士官國子監助教勤於訓
課升刑部主事榷稅臨清專尙寬政商賈悅服晉戶部郎授僉

憲督學河南奏最以參議用乞養歸

安慶府志

姚文燮桐城人順治己亥進士授建甯推官地據閩上游崇山
峻嶺盜賊多爲民患俗以睚眦相仇殺案如山積文燮片言立
判囹圄爲空閭疆初闢清丈量代民籌款造戰船以甦民困報
最改知雄縣值大水民多流徙文燮招徠復業者予以荒地耕
種捐資築城垣隄岸又請免被水田租修學課士邑志殘缺更

爲蒐討士民懷之遷開化同知尋署阿迷州爲吳三桂所囚乘

閒逃還滇寇平乞養歸

一統志直隸名宦

江皋字在涓桐城人順治辛丑進士知瑞昌縣瑞地鄰楚莠民多竄山谷閒劫掠上官議剿皋多方誘諭盡解散之歷守鞏昌官軍入蜀皋與帥約軍卒無符信不得入境忽有數騎入村漁奪悉囚送軍門斬以徇一軍肅然改補柳州僞逆初平殫心綏輯流亡復業他邑民有被掠在柳者悉資送之飭關津撫犒犗新柳侯祠柳人嚮學者奉以爲師遷四川提學去之日遠近送者相望不絕後補平慶道運給軍精歷隴塞賀蘭諸險作籌邊

九策擢大參罷歸卒年八十一

一統志廣西名宦

姚文燕字翼侯桐城人順治辛丑進士知德安縣值南康賊潰壓城守兵僅四十人居民百餘家文燕夜撤東西北三門兵民

盡登南城羅銅器以代金裂被帛以爲旗東蘆葦以代炬金鼓

震天賊疑援至遂遞舉循良第一例補臺省未任而卒

安慶府志

姚銳桐城監生四川梓潼知縣調富順擢知雅州稱敏幹卒於

官其弟合州牧孔鏞卽攝其篆政相頡頏州人比之宋時二呂

雍正七年銳子淮復知雅州亦有賢聲

四州通志新増

王尹字亞衡懷甯人順治辛丑進士知順德縣順德繁劇尹一

切供億不取辦里戶嚴絕羨耗順民德之簿書盈案批閱興除

悉中民隱邑素多盜摘發若神皆鳥獸散泣事三載以勞瘁卒

官

安慶府志

阮涵字子靜懷甯舉人任襄陽推官因奉裁復令關西力行惠

政山中有百歲老人命兒孫肩輿詣縣請涵出熟視不忍去曰

昔有令某亦江南人仁慈廉恕距今七十餘年乃復見公也入

爲工部主事民牽衣擁馬不得行者屢日

安慶府志

盧璣字爾琛潛山貢生知樂昌縣均徭役緩催科喪亂之餘哀

鴻漸集升大名通判擢永甯同知永甯故南詔地羌蠻雜處德

化漸摩俗爲一變署蒙化數月振興文學晉守溫州泣任三月

興利除害以勞卒官

江南通志

汪中和字子虛潛山人潛處要衝值軍興賦役不均建議立公

臺法公私便之官江都學博修學課士周給單寒卒於官閩邑

勒碑以志感焉

安慶府志

蕭蕙字叢玉太湖歲貢

懷甯志云
懷甯人

知寶坻縣多惠政嘗築渡濟

民民稱便焉捐資修學請改寶坻爲大學上臺薦廉能第一以

雙親未葬乞休歸年七十餘卒寶坻人請祀名宦

年七十以下
采太湖縣志

同邑曹昌穎官樂昌知縣爲邑請廣學額士林德之

安慶府志

孟之麟字睢應太湖拔貢永安知縣時羣盜蜂起官兵雲集軍事浩繁之麟多方應濟民得不困事平招集哀鴻尤多善政遷守涿州理煩治劇游刃有餘民甚德之

安慶府志

張兆奎字房郁宿松人順治初以歲貢歷鳳陽府教授捐資給貧生多賴以振科者遇士患難多方曲全乞休歸

安慶府志

任竣字松翰懷甯進士順治閒由主事歷廣東南韶道勸農輕徭平反大獄剿平番禺南海新會諸縣賊矜釋無辜民德之

懷甯縣志

縣志

張廷琰桐城人雍正二年任福建福清知縣四年春米價翔貴

巨族居奇閉糴奸民乘機強糴廷琰諭以強糴者斬閉糴者配於是奸民斂跡而巨族減價又請大府開倉平糴民賴以安其

治盜輕者黥面重者刳足宵小無敢邇境

福建通志

勞世沅懷甯舉人雍正九年知洪雅縣愛民課士頗多善政於

先哲遺蹟尤加意修葺

四川通志
新增

石毓璣字贊皇宿松人以貢考授中書掌典籍事文辭暢達翰

墨妍整以疾卒於京邸

安慶府志

陳五典字藥菴太湖拔貢知麻陽縣愛民重士麻陽運丁解米

四川寇盜充斥生還者少五典詳請改折全活甚眾在任十年

多惠政調息縣升瀘州知州歲旱虔禱甘霖立沛捐俸修學刻

孝經以教士風俗

一振解組歸

湖南通志
安慶府志

楊臣鄰字欽四桐城人康熙丁未進士知邯鄲縣軍書旁午部

署撫綏民得安堵以艱歸起補光山歲饑賑恤全活無算建義

學振士風光人稱關西夫子

安慶府志

姚文熊字望侯桐城人康熙丁未進士知蕭山縣閩亂未定檄

書旁午芻蕘糧取給於邑調度有方而民不困又振興文教
優禮賢士遷陝西階州亂後凋敝悉除無名之徵上官按例督
催文熊縛其吏之驕橫者撻而遣之遂從降調先是蕭山蝗起
移文於神忽大風雨蝗盡死又有逸盜自行歸獄曰夢父責之
不可累好官其神化如此既卒蕭人祀之名宦

浙江通志

何亮功字次德桐城人以舉人知古田縣爲政寬簡與民休息
暇卽進諸生談經講學一變其僻陋之習卒於官邑人購而歸
之

安慶府志

姚文焱字彥昭桐城舉人官長洲教諭歲荒爲賑糜粥並監藥
局擇醫治疫全活甚多升峽江令革陋規輕徭役峽人德之以

艱歸

江南通志

載芳字令及桐城舉人司鐸嘉定擢知仁懷縣值兵燹凋殘之

後極意撫循漸有起色邑歲稅茶數百金芳恐爲商民患罷之

卒於官

安慶府志

劉鴻都字爾雅桐城拔貢知廣昌縣土瘠民稀鴻都召墾荒地千餘頃給以牛種戶口日增民無逋賦設義學勵士風邊徼之地家絃戶誦致仕歸卒年七十八

安慶府志

何永駿字龍牧桐城人以貢知洪雅縣兵燹之後士荒民疲永駿課文章勸耕織風俗頓變

王師入東川例應洪民解餉禱於江神川水大發舟楫輸送較陸路省費不貲升辰州同知連署府事案無畱牘民咸德之以母老

乞歸

安慶府志

江之泗字四友桐城舉人官通州學正一以鄉里授徒之法教弟子員獎善誘不及情意藹然引年歸諸生紀其教績鐫之於

碑同邑張恂字子岐以貢官崇明縣教諭訓課稱良師升大理

寺司務性至孝迎母就養母思歸卽乞養終其身不出

安慶府志

張芑字武仕桐城人康熙中以貢通判武昌擢知府事裁兵夏逢龍以索餉鼓譟圍巡撫署芑正色叱之賊等加害父老數百人奔號懇免賊囚之欲授以官芑罵而裂其劄賊犯荆州芑越獄出東抵鄖穴錄狀上部請師剿賊會蘄州叛兵丁原在倡眾內訌芑與守備李醇計擒斬之駐道士汛檄屬縣討賊賊不敢東下隨振武將軍克復黃州獲逢龍賊平擢工部員外郎

一統志

北名宦

姚士基字履若桐城人以舉人知羅田縣革陋規千金弭盜以牌甲催科以紙阜建公堂遷學宮祠忠烈置義冢設渡筏皆以實心行實政將應行取而卒羅民焚香泣送建祠祀之稱姚公

會羅田縣志

張廷瓚字貞城桐城人大學士英長子康熙己未進士入翰林陟宮尹趨承講帷屢應纂修之任

聖祖仁皇帝北征沙漠三臨絕塞以儒臣得與扈從之列屢被

殊恩益務恪慎分校禮闈典試山左皆弊絕風清尤熟於掌故一切大

著作多出其手子若霖字巖舉天性孝友好義樂施文行兼茂

稱令子焉

江南通志
安慶府志

江廣譽字繡聞桐城人康熙乙丑進士授臨邑知縣嘗謂民猶子也忍股削其子以自肥乎課賦徵漕曲盡撫字洗滌羨陋爬櫛蠹垢胥吏不敢爲奸訟者至庭手批口決曲直立判飛蝗入境爲文告神蝗盡徙去邑乏甘泉至是涌出民勒石曰江公井以疾卒官

安慶府志

陳堂謀字大匡桐城歲貢授青浦司訓改丞東鹿上臺重之屢
舊州縣篆於束鹿則平牙行斗斛禁田糧詭寄於故城則免挑
河之苛派革糧里之幫解文景州積年未清之廠除祁州額外
私徵之稅以艱歸遂不出

安慶府志

王玘字其人桐城人由廩貢教習授樂城知縣歲革羨餘千金
浚井數百助民灌田樂人德之遷紹興通判開濬三江閘及杭
城內通商河道俱百餘年堙廢之蹟又佐開高寶等處下河監
督丁溪草堰兩海口適限報竣以卓異遷南河同知尋升彰德

知府致仕歸

江南通志
安慶府志

吳玉藻字冰持桐城人以貢官內閣中書乞養歸親歿服除補
成都同知勤於吏治案無畱牘攝馬湖雅州諸篆皆有治聲卒

於官貧無以斂上官爭賄之機始得歸

安慶府志

姚士重字勃少桐城拔貢授宣城訓導建培風閣以養士遷新喻縣丞署高安篆高安苦徭役不均爲破圖編里民咸稱便勒石誌愛又署新喻篆以漕務不忍苛民致仕歸

安慶府志

錢旆字菽邕桐城人康熙戊辰進士知蒼溪縣以廉靜爲治上官或謂其不能試委署他郡縣公事立辨治獄悉中情法乃更有能名將奏最而旆卒蒼民哀慕致賻以歸其喪

安慶府志

孫元衡字湘南桐城人以貢知新城縣濬孝婦小清兩河以殺水勢築隄十八里以捍水衝捕蝗賑濟全活無算以卓異擢蜀之漢州招徠流亡給牛勸耕會蠶蠻蠢動身歷行閒轉運不匱擢臺灣同知建文廟設義學歲饑令商船俱運米多者重其賞否則罰於是南北客艘雲集米價大減民遂得不飢升東昌知府母喪歸郡民塞道號泣

一統志 福建各官 江南通志 安慶府志

張夔字次皋桐城人以貢歷知平山固安清苑皆畿輔近邑有
鄆民疑獄久未決夔至立辨又章氏婦爲強暴所偏廉得其狀
一時稱爲神明舉荒政建義學毀淫祠所至仁惠有聲擢大名
廣平兩郡同知督理河務漳水決身親畚鍤捍禦隄防河患乃
息又捐俸賑給活災民數千人以勞卒官士民請祀名宦

江南通志

高可極字爾建潛山歲貢知永豐縣下車卽詳食鹽免充廣餉
捐買馬不起民夫以老乞歸士民焚香泣送數十里

江南通志

姚士塾字庠若桐城歲貢官碭山教諭提撕鼓舞一變其風遷

朝邑知縣首革編審費千餘金秦大饑流民載道捐資數千金

設粥廠四以食之令胥役搜灌莽中遺嬰賃乳婦育之瘞其殍
贖民婦之鬻者還其夫以痺疾請告歸數年而朝邑民猶絡繹

來問疾卒祀之名宦

安慶府志

姚士暨字注若桐城人以貢司諭睢甯培育寒士置祭器建烈女祠歷遷刑部郎精律例論決平反大司寇佛倫張玉書並稱其才他司疑獄必令覆閱始奏值河南有大獄株連不休

詔擇員往勘以暨對

上曰此故尙書姚文然子耶宜可使果得情以報因病乞歸

安慶府志

咎茹穎字仲遂懷甯人康熙壬辰進士纂修子史精華授內閣

撰文中書舍人掌絲綸詔敕多出其手性孝友父坐未厝不安

枕席兄蔚林官會稽令以吏事解官茹穎憂思成疾而卒

安慶府志

姚士堂字佩若桐城舉人官中書舍人勤於其職所書制敕閣

下環觀歎絕入武功館纂修方略宏偉有制總裁者命以爲程

安慶府志

方將字當時桐城歲貢歷官孝豐知縣減耗金寬徭役以廉讓

爲教訟牒日稀攝吉安長興篆所在有聲邑紳士紀其政鐫之

石

安慶府志

倪灝字繪江桐城人官高平丞卻稅羨千金值西陲有兵事造車轉饟戴星辦理刻期不踰捕蝗長平驛齊戒籲天蝗盡他去盜據山爲患灝搗其巢平之遷令南漳歲饑甫請賑貸卽開倉散給修泮宮建義學善政甚著

安慶府志

方正璫字絃長桐城人知五臺縣居官廉惠治獄多所平反活死囚二十餘人修學宮舉荒政築河隄造船資往來邑人賴之

安慶府志

吳昉字五玉桐城副貢司鐸豐縣士習文風爲之丕變再攝邑篆有豪民殺人者輦金求釋卒抵之法年八十卒於官士民道

祭者皆哭失聲

江南通志

夏瓚字景文桐城選貢知呈貢縣振興文學革除陋規給牛種

以勸墾歲饑多方賑救全活甚眾以病乞歸

江南通志

倪念祖字紹衣桐城副貢知福安縣吏某爲妖祟數年草檄毆之妖立滅有奸民名鐵機或僧或俗詭異非常爲鄉里害前令捕之不獲念祖計擒而寘之法卒於官櫬歸哭送者數十里不

絕

安慶府志

張有字字鶴田桐城人以貢歷南川知縣南邑踞萬山中地僻民稀令此者率傳舍視之有孚捐資廣衙舍修通道路招集開墾立義學課其子弟之秀者革里長以省民費民甚便焉爲治九年四方就居者千百餘家地以富饒民以安樂卒於官民祠祀之

安慶府志

張若需字雲舉桐城舉人任嚴州同知攝義烏篆捐金造東門

義橋邑人名張公永濟橋建祠橋側祀之遷梧州守輯盜安民
平糶給種多著善蹟擢蒼梧鹽驛副使病卒

特贈按察使銜祀廣西名宦

江南通志

羅士修宿松人康熙中知湘陰縣嘗署聯於門以暮夜金爲誓

歷署劇邑俱有聲

湖南通志

何景宣字在中宿松歲貢授上元訓導適海氛抵石頭率諸生
七百餘人登城捍禦寇平總督列名疏題有內固外防保守封
疆之語奉檄署高淳溧陽兩學篆振興文教並爲諸生釋望誤
清積逋後補英山宜興教諭兩學廟皆傾圯捐俸倡導殿廡祠
署皆鼎新委署宜興篆卒於官士民立坊表之

宿松縣志

吳雙潛山歲貢康熙四十六年知德陽縣仁明清苦不傷財不
勞民邑人德之去之日紳民堞像於許旌陽之側

四川通志

姚孔鏞字祝如桐城貢生康熙四十六年四川合州知州興學重農催科不擾民樂輸將歷八載卒於官士民哀慕不忘

四川通志

增新

王文燦字蔚然桐城人明末避兵入粵籍蒼梧中康熙癸卯舉人任清遠縣有惠政以招叛功當遷官顧以母老告降改象州

學正

廣西通志新増

魯之裕字亮儕太湖人康熙庚子舉人授內閣中書出爲河南確山知縣嘗奉委摘中牟令李某印知其冤代白制府釋之歷官至清河道上疏請廣從祀又疏申禁酤酒及天主教收徒回教不遵正朔又請興畿南營田水利及依科截取舉人後多准行以直隸布政使參政致仕所著有長蘆鹽志下荆南志式馨

堂詩文集

太湖縣志并呈册

龍光字二爲望江人康熙丁未進士授中書出任太原同知詳
請逃人連坐隱匿真正東人則坐新買小卒則不坐得永著爲
令署甯化縣時耿逆總兵張彬殺謝尙謀占其妻妻逃鳴冤光
案彬罪詳請立斃杖下升守臺灣時海氛猶未靖操練防守海
疆以安卒年九十

望江縣志

龍燮字理侯光之弟康熙戊午以薦舉鴻博授翰林檢討與修
明史遷編修改大理寺正據經以決疑獄眾其推之後爲工部

員外郎卒

望江縣志

黃宗顥字雲子太湖人官湖北大冶丞值夏醜煽動民多逃竄
拊循慰勉得免流散署通山篆有牛銜利刃奔階下使人尾之
偵得屠者論如法邑稱神君又署嘉魚奉檄修隄凡已廢陂堰
盡復之卒於官其子鬻產始得扶櫬歸

太湖縣志

余光全字完子潛山人康熙壬戌進士知安南縣邑多苗蠻羣聚爲奸光全下車慨然曰此莫非吾赤子資生無策故至此耳爲嚴行保甲法有游手者畀以牛耕勸使歸田一時安堵士民立祠祀之後升戶部主事解組歸

潛山縣志

張廷玉字衡臣桐城人大學士英次子康熙庚辰進士選庶常授檢討歷官

保和殿大學士加太保封三等伯立朝五十餘年爲刑部侍郎時山東鹽販糾眾不法巡撫獲之以謀逆奏廷玉奉

命同都統託賴等往訊盡得其情誅其渠魁餘多原有雍正初充

聖祖仁皇帝實錄館總裁二年疏言浙江江西棚民之害請編入戶口其未久者取具連環保結下督撫議行十一年條奏慎刑二事請刑部分別人犯收禁取保及引例不確應令都察院大理寺

駁正皆下九卿議行

高宗純皇帝御極充

世宗憲皇帝實錄館總裁三年

上將視學

命軍機大臣議奏三老五更之禮廷玉疏言其不可行者數端

上聽其言十五年以年屆八旬

恩准致仕家居五載終於里第年八十四

賜祭葬諡文和配享

太廟所著有奏疏及詩文集若干卷

一統志
桐城縣志

孟安世字康子懷甯舉人邳州學正康熙時河決學宮圯安世捐建東廡請復優免銀佐士子膏火著寒燈閣詩讀書堂文集

懷甯縣志

新增

楊汝穀字令貽懷甯人康熙庚辰進士知浦江縣有異政行取
擢主事遷郎中授監察御史劾奏河南南陽鎮標兵以查拏賭
博辱知府沈淵寘兵於法總兵以下論如律擢太常少卿奉天
府丞晉右通政雍正元年奉

命祭告少昊金天氏等陵擢通政使遷左副都御史晉兵部右侍郎奉
命往清口致祭河神復奏隄堰濬築事宜轉左侍郎乾隆元年奉

命祭告南嶽奏免河南滎澤縣坍塌地錢糧三千餘兩及除河北太和
山香稅民咸便之調戶部左侍郎擢左都御史以老致仕卒

賜祭葬諡勤恪著有靜用齋集十五卷

一統志

江爲龍字我一桐城人康熙庚辰進士知宜春縣修泮宮建義
學以直恕聞擢兵部主事監賑直隸饑民經畫盡善制府薦爲
賢能第一丁酉典試山西歷官文選司員外郎

桐城縣志

張廷璐字寶臣廷玉弟康熙戊戌榜眼授編修歷官禮部左侍郎兩爲南宮分校三典直省鄉試爲江蘇學政九載弊絕風清乾隆元年

諭祭大學士張英於本籍

命廷璐就任所回里舉襄典禮四年回京奉

旨纂修五禮悉心蒐討博求典籍參之時宜而一代不刊之典以定九

年以老致仕明年卒著有詠花軒詩文集

桐城縣志

張廷璩字桓臣廷璐弟雍正癸卯進士選庶常授編修歷官侍講學士疏稱嚴禁賭具責成同居父兄伯叔互相覺察容隱者照竊盜同居例治罪出首者除不連坐外本犯罪作議減北直大水督臣請以工代賑稍給工食廷璩疏言官給半直富民有田資隄者亦給半直則饑民方濟

上禮其言允行焉十二年擢工部右侍郎乾隆初充

世宗憲皇帝實錄館副總裁元年充會試副考官五年提督江蘇學政

九年以內閣學士典試江西十一年以病乞休歸

桐城縣志

姚孔鎰字翰擢桐城人官永平知縣擢滄州知州歲饑官賑止

正月乃捐廉爲紳士倡加賑至麥秋時民無餒者時以滄地濱

海初設駐防兵民相構釁乃多方開導準以情理之平地方帖

然後以艱歸起補葭州知州積勞成疾卒滄人祀之名宦

桐城縣志

楊之駢宿松貢生康熙時由太平教諭令公安勤於撫字尤加

意學校嘗捐俸修名宦鄉賢祠又建武侯祠竹林書院給義學

膏火官六年去任父老郊餞斤斤以勤儉爲屬

宿松縣志引公安縣志

王應珮字韻瑒望江人康熙己丑進士授內閣中書出爲河南

通許令攝蘭陽捐資備學宮樂器己亥辛丑豫比不登哀鵠徧

野應珮百計安集民免流離以卓異擢大理評事歷監察御史

卒於官

望江縣志

方正玠字弼采桐城舉人知無極縣縣之木道溝界流沙中溝常淤阻田苦沙壅水發復泛濫爲害正玠疏通溝道田皆得耕民有被誣爲盜滯獄三年者爲廉得眞盜雪其冤擢福州理事同知署永春州永民好械鬪互有殺傷到官復論抵正玠誠諭備至俗漸革乞休歸

桐城縣志

左宰字維三桐城人康熙辛卯舉人知建陽縣耿逆之變民人逃避田賦拖欠往往令本族及里甲代償前令李六成憫民之艱爲虛報荒田若干頃開銷抵算後人不察以爲冒免稟請開復宰蒞任後據實稟請上憲開豁大吏知其誠允之宰居官清慎而此事尤爲一邑永利云

桐城縣志

左文高字迓平桐城人雍正丁未舉孝廉方正知遷江縣革陋
規則衙蠹上林爲遷江鄰邑有樊氏聚眾爲寇鎮府剿捕賊將
竄入遷江文高召土丁諭以利害眾皆聽命乃屬營將伐木樹
柵掘濠塹自率壯勇入山崗中遷江之通賊者方椎牛釀酒以
待上林之賊猝遇官兵一時驚潰文高搜捕凡三百人以首惡
伏法餘多全宥竟以勞成疾乞歸而卒

桐城縣志

方正瑗字引除桐城舉人授內閣中書轉工部郎中釐剔奸弊
旋授陝西布政司參議分守潼關道屢辦軍需出嘉峪關轉輸
糧餉以幹略稱創開西書院與諸生講學士風以振丁內艱以
軍需故給假三月治喪懸缺以待關中民多有以訟事至桐求

申理者

桐城縣志

張廷慶字容懷桐城貢生教習知安陸縣調江夏縣濱江皆隄

京口尤險雍正己酉夏雨甚隄將潰廷慶奔走雨中往來相度
築塞隘口雨不止而水愈急乃仰天長號願投水以延萬民之
命百姓抱泣須臾雨止水退民慶更生歷升湖北糧儲道桐城志
張廷球字澤臣桐城人雍正中歷任永福福清等縣值漳浦不
靖廷球往招安單騎抵境流涕曉諭民皆感泣亂遂戢擢知龍
巖州在任十二載去之後民追思其德建祠祀之桐城志

重修安徽通志卷一百八十一

人物志

宦績四

安慶府

張若震字宗岳桐城人廷璐子以舉人知天台縣歷官湖北巡撫乾隆壬申時任陝西布政值歲大歉詳請奏賑大府不可遂徑檄州縣開倉發給自行陳奏大府以擅動倉穀題參旋奉

旨嚴飭大府竟允其請通省全活者不可勝計升湖北巡撫吏畏民安其入告諸疏如請廣收粟麥以實倉儲清查弁丁以杜詭冒運川銅以供楚鑄撥楚米以濟浙災皆於國計民生有裨卒於官蒙

賜葬祭所著有奏議雜文及靜春齋集

桐城縣志

姚鈴字卿如桐城人知貴州湄潭縣縣治多山少水艱於溉田鈴教以竹製水車穿山架壑源流數十里民甚便之歷升戶部郎中出知紹興府督治隄工寒暑無閒捕盜緝奸豪強斂跡調

處州卒於任

桐城縣志

姚淮字思尹桐城人雍正初選授雲南河西知縣邑舊有街稅首革之立石示禁民閒額稅不知科則不給印票乃刊給易知單然後民知定額邑東南北食琅井鹽獨西路食黑井鹽路遠而價昂或通融買食則指爲私鹽爲力請大府改鹽法又罷礦廠牛運之役焚窮民借穀之券掘土目假冢之佔民墳流不法淫僧以除民害擢雅州知州請減稅課革差徭打箭爐土司死妻無子而妾有子妻欲立其弟與妾爭印將構兵急馳往宣諭立妾子而還遷重慶府同知酉陽邑梅兩土司民爭界誣邑梅

民十七人謀叛十餘年不決瘐死七人爲察其枉雪而釋之苗

人感服累擢至嘉湖道卒

桐城縣志

左興字性成桐城人以保薦歷知廣東潮陽南海諸縣擢南澳同知權惠湖道知瓊州府事惠潮有巨盜陳班峯出沒海上爲二州患上憲以爲憂興伺其登陸分眾兜剿而自率百人趨海隅焚其舟賊無所歸盡就擒瓊州孤懸海外黎母之民率多不靖興陰撫熟黎使爲偵探生黎有不法者輒擒治如律諸黎咸驚怖不敢竊出爲害

桐城縣志

姚孔鉉字道冲桐城人雍正丁未以薦擢知縣發廣東初署恩平風聞匪民將劫庫爲亂密修備具探知賊蹤親率壯士馳至土瓜節

桐城縣志作萌

擒其渠李梅等十數人誅之及省中發兵至事

已定矣調番禺有某官所任耳目吏私有所干立杖之遷保昌

護南雄府篆禱於神而毒草自萎螟螣自消擢知韶州府請免
惠韶開採銅礦二郡便之後知贛州修郡城及學宮書院郡米
驟貴贛令出示減價市幾閉糴急諭重其價以招客米船銜尾

而至數日價平前後累決疑獄活人於垂死者不可勝紀

桐城縣志

姚興滇字南召桐城人初官滎陽丞以薦知山西太平縣濬治

史村舊河溉田無算調臨汾攝洪洞西藏用兵往來絡繹親巡

慰諭民用不擾擢隰州升知山東武定府創建書院振興文教

濱州有王四夏天增者殺人抵死疑其誣爲之請釋上官不許

密訪眞凶獲之冤乃雪又捕獲陽信巨盜合郡宴然調曹州疏

河以免水患賑災以活饑民兼擒巨盜姚黑餘黨悉散後坐所

屬審案遲延謫戍軍臺人皆惜之

桐城縣志

方求義字綺亭桐城拔貢知龍南縣攝安遠歲饑請糴藩司不

許愀然曰藏穀備災災而不糴焉用穀爲空其倉以賑民撫軍

嘉之檄他邑爲例移上猶尋乞歸

桐城縣志

張若淮字樹穀桐城人雍正庚戌進士授兵部主事歷郎中擢御史建白皆爲時所便累擢至刑部侍郎晉左都御史持風憲甚嚴時有憚之者欲以事中之終不得毫髮私以疾歸嘗充鄉試同考官督山東學政總裁四庫全書雖貴而衣履如諸生卒

年八十五

桐城縣志

方浩字孟亭桐城人雍正庚戌進士知祁縣移隰州時民惑於大乘教茹齋者數百人浩悉召至庭飼以酒肉有不食者強之後邪教牽連數省隰民得不染累擢至贛南道贛有奸民爲盜者設法購捕不逾月俱獲旋以公誤降官事白而卒

桐城縣志

胡承澤字廷簡桐城人雍正庚戌進士授刑部主事出爲靈石

知縣治獄多平反興利除弊知無不爲士民頌之

桐城縣志

金大光字龍臣望江歲貢司訓霍山捐俸修葺學宮俎豆禮器

煥然一新卒於官著有閒亭閒草霍山吟

望江縣志

范正笏字廷獻潛山拔貢官巢縣教諭修學宮建諸祠備祭器

輯巢志巢人立碑紀之歲饑勸糶穀價以平

潛山縣志

李維璽字篆師太湖歲貢官當塗訓導捐俸修學建大成坊奉

檄辦賑災黎均得實惠調和州學以年老歸著有姑孰吟等稿

太湖縣志

陳宗韶字虞九太湖歲貢官虹縣訓導歲歉奉檄散賑方大雪

惻然曰吾不忍飢民冒雪來也遂徧歷各鄉往賑之竟以是得

寒疾卒虹人傷之

太湖縣志

方觀承字退穀桐城人雍正十一年由監生隨平郡王赴北路

軍營掌書記十三年還京加中書銜乾隆元年補內閣中書直
軍機處七年歷郎中出爲直隸清河道歷藩臬二司十三年擢
浙江巡撫明年晉直隸總督兼管河務尋加太子太保三十三
年卒於官

賜祭葬諡恪敏觀承學問淹貫通達事體恪勤奉職在山東稽查漕弊
嚴緝盜匪疏免安山南旺二湖升科在浙江開墾大壑漲地三
十五萬四千八百餘畝增雜糧十萬石並奏禁婦女普陀進
香及豆麥雜糧私運出海在直隸尤畱心水利濬治永定滹沱
白溝等河搜考奇材雞距等泉原委改移永定河之下口又條
舉木棉事十六則繪圖列說以進

御題詩十六章並

命將觀承所作詩書於每幅之末四十二年題准入祀直隸名宦祠五

十一年奉

旨入祀賢良祠

一統志
桐城縣志

馬占鼇字載陽桐城人考授州同歷兗州泉河通判泗水尹家
城東嶺舊有浸泉流甚細泉夫屢妄報胥吏朋比爲民害占鼇
行縣勘實不能達河濟運爲通牒院道檄縣永禁泗人德焉立
石以紀其事後補中城兵馬司指揮有流毒富商而縊於其門
者立往驗而白之

桐城
縣志

馬鵬飛字樂山桐城人考授州同歷知南匯靖江崇明宿遷諸
縣其在靖江以邑中水利惟圉河港是賴而一切支流半成陸
地乃循行港道捐俸開濬居民賴之初至宿遷積案千餘期年
而訟清事簡大府奏江南治行第一歷開封同知升歸德知府
皆有政聲

桐城
縣志

馬澤字根香桐城舉人知陽信縣勸農桑均徭役調繁長清訟

清政理以事解組士庶傾城追送贈遺一無所受

桐城縣志

潘恂字蘭谷桐城人乾隆壬戌進士知震澤縣歲饑不待申請開倉以賑民賴全活歷知江陰上海陽湖所去莫不遮道攀轅赴大憲乞畱者在陽湖時承辦江陰匪徒徐晉臣偽造海票之案首惡抵法餘多省釋升常州知府開孟瀆德勝二河溉田數萬畝爲設立小河閘因時濬洩至今賴之歷擢杭嘉湖道三權臬篆獄多平反以勞卒官

桐城縣志

熊會琮字公玉潛山人初署上海典史縣有奸民聚眾號擄江網縣令捕之毀輿歸巡道將會遊擊以兵進剿會琮請無用眾獨往縛之至則賊大譁露刃見僅一官一役乃稍定會琮曉以利害許以不死爲首者十餘人墮入城先伏健卒於門縛之其

黨千餘人星散補崇明丞辦賑有異績巡撫邵基遺疏薦之蒙
召見知縣以下得

召見者自會珍始旋補寶應知縣築尹公隄寶應民俗婦不得於姑者
輒縊母家聚鬩沴氣乘之縊者遂多日數報殺然曰是可止也
遂往陳婦屍數以不孝之罪而鞭之其風遂止屢擢至徐州知

府
望江縣志

楊超恆字自芬懷甯人汝穀孫也乾隆丁巳進士知藁城縣吏
輕其年少串供頂凶以出人罪升堂數語立摘其罅漏卽置吏
於法一邑驚爲神明以艱歸起補觀城知縣又以艱歸起補增
城知縣屢決疑獄邑無冤民三縣人至今尸祝之
懷甯縣志

楊嵩年字申侶懷甯歲貢父一元嘗以歲貢官嘉定訓導有盛
德屢捐金完人夫婦嵩年官武進訓導歲饑分賑戶口必親歷

散給吏胥不能欺又爲縣分催積逋委曲勸諭民用不擾去之

日士民送者塞途

懷甯縣志

龍廷棟字宇一望江人考授州同知累官至廣州府知府誅劬

奸吏清釐積案修整養濟院育嬰堂府屬納米向多折色民苦

重值廷棟禁而革之合郡德焉卒於官廣州人思之不置

望江縣志

宋光恩望江歲貢官靈璧訓導邑有水災奉檄分賑同委者四

人其三皆以侵蝕見黜惟光恩以公愼廉介爲當事所重後署

教諭致仕歸士庶送者塞途不絕所著有虹州集

望江縣志

張廷琛桐城人文端英子也乾隆初知茶陵州下車祇攜一僕

茹蔬飲水友事端人與利革弊雷厲風行訟無巨細投牒時往

復駁難不直者遽斥之稍直者刻期聽斷無不得情居一年困

圉幾空暇則構學舍集諸生課藝指授如師弟以升任去州人

士卽講堂祀之

湖南通志

姚孔鐸字天木桐城人官崇仁縣丞署縣事值歲大荒孔鐸辦

理賑務竭盡心力捐廉不足復以家資助之全活甚眾

桐城縣志

方世儔字竹溪桐城人乾隆己未進士由戶部主事擢御史錚

錚有聲歷鴻臚太僕寺卿出爲陝西布政使治陝六年升貴州

巡撫移湖南爲政事務大體不事煩苛三省吏民咸懷其德

桐城縣志

縣志

張若本字根實桐城人乾隆壬戌以明通榜授丹徒教諭升新城知縣履任卽改錦秋湖爲稻田捐建義學修理河防調曲阜曲阜向係世襲初改流官更新之際頗難合宜若本鄉建義學社建義倉各十六所四氏考棚久頽力爲修理委辦伊家河工恩威並用士民帖然升漢陽府同知稽查匪徒謹備火患漢鎮

大治卒於官

桐城縣志

方輔悟字惺民桐城人知臺灣鳳山縣會黃蛟作亂鎮兵往剿糧餉倉卒無指輔悟亟發庫藏軍需無缺或以未經申請爲慮答曰隔越重洋待報必誤雖獲咎不能顧也及事平果以擅動帑金褫職鳳山士民奔省籲畱大吏以聞奉

旨以知縣需次江蘇補儀徵調上元卒於官

桐城縣志

許曾裕字崙高桐城人官松江府通判地濱海葑田鹵港多淤塞民閒向有公項巨萬爲挑濬費多爲吏胥漁奪沿海設有烏船出哨監修者多徇吏報修船出海輒壞曾裕俱身自督役河濬港尾修廣深曲皆有尺寸海船完固積弊悉除民爲立石以紀其績

桐城縣志

許邁字嘯斗桐城舉人官高郵州學政勤於造士嘗奉檄委勘

水災以不忍之心矢公勤之略著有勘災絕句二十首纏綿愷
惻聞者動心卒於官士民皆痛惜之

桐城縣志

張若翼字肅中桐城廩貢知廣昌縣舊有疑獄逮繫多人若翼
到任立爲判決自是案無畱牘勢家請託不行旋以治行內升
刑部主事贊理平反歷官內外勤惠如一以疾告歸

桐城縣志

張若矩字開中桐城人官泃河通判屬吏侵帑行賄直揭其事
忤上官意落職久之得白起補桂林通判引見

上嘉其前事特擢永安知府抵任值苗民蠢動將用兵若矩請身往諭
之遂單騎入瘴鄉開誠曉諭苗民感泣事遂定黔中軍興轉輸
糧餉輓運數千里毫無遲誤以勞卒官

桐城縣志

葉中宇登明桐城舉人知隆德縣調平番升河州知州平河兩
地番回雜處民貧俗悍盜賊橫行中嚴加告誡治以重法四境

肅然卒於官兩地皆祠祀之

桐城縣志

姚肇修字蓬觀桐城舉人知光山縣邑蝗親行赤日中督捕數日而盡金川用兵部署壘站民不知擾去任士民焚香遮道送

至境外

桐城縣志

方夢袍字民賢桐城舉人知安遠縣俗親喪演劇靈前名曰饌喪夢袍拘其主喪者荷校以徇又死者葬已數年復開柩舉骸骨就水刮剔名曰洗筋禁之不止乃依律治之風始革邑九龍山產茶歲貢常例外輒多徵數十萬斤夢袍請於上官減十之三著爲令民甚德之

桐城縣志

戴涵字華渚桐城舉人知玉屏縣調普安有爭地互鬪者前任以民變聞大吏擬用兵涵往接篆力阻之遂親赴爲定界拘首惡責治事得寢升安順府知府土官某叔姪爭襲涵勸諭感悟

孝友終其身擢貴西兵備道金川用兵檄辦軍餉以勞成疾告

歸卒於漢陽舟次黔民無不感泣

桐城縣志

李宗典字鴻遠懷甯人考授州同知借補仁和場大使雍正間海潮爲患大吏委視隄工亟督築翁埠隄至李家村五里工甫畢而海嘯至蘇松皆被災杭獨無害委濬海塘引河有老人告以借涵刷沙之策得清水源於蒲草窪疏濬十里而引河成乾隆初擢柴塘通判浙民德之乃泐於石以誦其功以艱歸改畱江省補用十一年委勘無爲州江工江南岸高水北衝宗典謂當與水爭不當以地讓令民於北岸迎衝之處載土沈舟引濶而東果得岸出濶移民無江患尋補徐州通判宗典謂徐界黃運二河之交又東省湖水下注非廣浚溝渠不足以資蓄洩而備旱澇因具圖說於冊議請舉行會去不果後擢金山海防同

知卒

懷甯縣志

熊仁泰字紫田潛山人知山東朝城縣廉能有聲會天旱步行二十餘里禱雨龍神廟士民爲設饌甚豐仁泰見村童令持其所食來則糠粃雜豆箕也曰民食如此何能下咽命瘞之雨立注朝城人至今祠祀之

潛山縣志

陳道濟望江人乾隆二十六年四川閬中知縣愛民重士善察情僞奸猾不能欺振興學校考課嚴明文教因之丕變邑雖繁劇一時有政簡民安之慶

四川通志新增

魯晉字詎疆懷甯人乾隆乙丑進士初署惠安邑地濱海民開田受潮取鹽課有贏餘晉毫不私舉以償民逋欠補松溪縣隄盧山有鐵鼎每禱雨迎入城輒應歲旱吏以爲誚不許惟虔誠齋禱甘霖立沛鄉有童子被殺晉傳諭於近村五里稽查戶口

母許隱漏一名有姬自言子出外已五日即詣姬室搜得童子

白銀繫項圈擒其子一訊而服邑稱神明後以母老改鎮江府

教授著有周易微言養素齋詩古文懷甯縣志

方玉麟字耕杞桐城人乾隆戊辰進士揀發湖北歷署松滋咸

甯鄖縣在咸甯築長隄以禦洪水鄖與蜀接壤鳥道嶽寄捐俸

開通往來者蒙其利卒於官家無餘財聞者傷之桐城縣志

周大魁字鴻庭桐城人乾隆庚午舉人知泗水縣改全椒教諭

卒於官士林感其德教子孫遂家全椒全椒縣志 舊志 新志

張曾敝字愷似桐城人乾隆辛未進士選庶常授檢討歷擢至

侍講學士自文端至是四世侍

經筵矣敝才器通敏博識古今事宜及一切掌故而持己清峻三校

順天鄉試眾皆知其公慎廉介己亥分校會試榜發為忌者摘

其所薦梁泉卷下吏按驗事雖白而竟以此坐廢時論惜之後以

萬壽加恩復五品頂戴

桐城縣志

左衢字賡唐桐城人乾隆壬申進士由內閣中書擢宗人府主事嘗充庚辰順天同考乙酉陝甘副考官選拔皆得人平生無疾言厲色而持正守潔莫敢干以私卒於官時論惜之

桐城縣志

張若淳字聖泉桐城人由刑部主事歷府道卿尹至刑部尚書宣力中外五十餘年舊制內閣衙門非科甲不與乾隆丙午奉旨升授內閣學士有張若淳非他臣可比嗣後不得援以爲例之

諭天下榮之在內閣時奏請各督撫講求伐蛟之法及教民種薯以爲救患防災之計在刑部案無巨細必反覆推求期於無枉無縱而後已若淳居心縝密每有建白疏入輒焚其稿家人不得知

嘉慶壬戌卒於官

賜祭葬贈太子少保諡勤恪

桐城縣志

張若瀛字印沙桐城人兄若淮仕至左都御史爲人端凝樸慎而若瀛慷慨強果始以書館膳錄授主簿借補熱河巡檢畱守內監爲僧者曰于文煥一日行道見其橫肆立柱之內府總管直隸總督皆以擅杖近御奏

上不之罪後爲良鄉知縣順天南路同知畿南多回民相聚爲盜若瀛多布耳目親往捕之獲百餘爲盜所誣以枉良革職

上見其名交軍機處覆問減其罪發甘肅以知縣用署張掖復營兵所奪民渠水利又請除黑河沙漲廢田數百頃糧稅引疾歸以子鴻恩爲兵部郎中

封朝議大夫

桐城縣志

吳元念字在宮桐城人官雲南建水知州有治蹟攝臨安知府
蒙自縣民呈控某鎮有聚眾滋事者密諭健役拘數人至視其
械皆防夜之具乃鞠誣首者服罪而盡釋之民藉以安他若建
書院立橋梁滇人頌德不置丙升戶部員外郎乞養歸

桐城縣志

勞敦杰字殿欽懷甯人乾隆甲戌進士知山西岳陽縣晉俗淳
樸歲時之吉縣老人及婦孺多至署爭致果品等物輒與言孝
友廉讓轉相勸化獄訟衰息調介休牒未下有邑豪某交通官
吏預知狀試略以利佯爲好語卻之及到縣果以事相干立斥
其罪一縣感悅今岳陽介休皆立有勞公祠

懷甯縣志

馬家良字仲衡懷甯舉人知新興縣訟者至庭陳譬設喻往往
感悟自去徵課聽民自輸不遣胥吏下鄉曰此輩最病民凡爲
宰者宜首念也歲大水具狀請賑先支廉俸二年給之不足益

以衣裘簪珥凡五千餘金所活甚眾後擢貴州正安州再起署四川會理州以艱歸旋卒子光輝初官訓導後擢同安知縣調河閒值歲荒賑卹有法調望都有大吏家人騷擾驛站立杖之再調宛平以事罷官

懷甯縣志

楊樞字瞻斗懷甯拔貢署上海縣丞時徐州蝗起奉檄捕治徒步夜率民役秉燎火焚之預掘阡坎且焚且蹙蝗不爲災擢太

倉州同

懷甯縣志

李國麟字惺齊懷甯人乾隆壬申進士知邵武縣歷長泰南安等縣調成安爲令三十餘年老於吏事治疑獄往往出人意表發其奸伏人以爲神後擢兵馬司正指揮卒

懷甯縣志

石文成字聞涿桐城人以諸生考職選長沙縣丞升城步知縣擢寶慶府通判爲政抑豪強恤孤弱凡蒞任之鄉民皆尸祝咨

部以知州用未選而卒所輯有歷朝詩話著有曉堂集十二卷

桐城縣志

龍承祖字企軒望江舉人官刑部主事歷擢至江蘇按察使官

刑部時折獄平反讞一案必折以例議一事必察以情及陳臬

三吳稽案牘錄囚徒廉明忠厚一如其在部時以勞卒官

望江縣志

王鳳詔字奉書潛山人以聞官蓄洩有功擢鉅野主簿歷升至

泃河同知調上南河同知越歲餘伏汎南趨楊橋大壩被衝鄭

州十八堡中牟十堡皆危急鳳詔晝夜區畫備極勞瘁隄獲保

全大計得上考旋奉檄監理祥符隄工目不交睫者數旬以勞

卒官開封人立祠祀之

潛山縣志

趙之璧字明川桐城人以舉人知北流縣縣多惠潮流民夜聚

曉散有張大眼者以事到官察其情狀陰險卽命役同保長至

其家搜捕則賊竊也按律定擬惡黨皆散安南內訌奉檄署鬱林州兼理陸川縣事復帶佐貳等印凡七職供給軍行事理而民不擾後以運銅卒於差次民皆泣下

桐城縣志

方世仁字松樓桐城舉人知邵陽縣邑多健訟世仁勤於聽斷有審理數千案冤屈無一場之謠邵糧向係都差代揭知其病民不許並禁採買派累告歸百姓圖像刻石以誌盛德

桐城縣志

張曾敏字遜求桐城人官南陵縣訓導升山西靈石知縣縣有派採馬草之例抵任卽革之而民困蘇且禁攔截過客車馬以便行旅調屏山增城浚隍修書院金川用兵任轉運之役籌畫盡善大吏咸倚重之

桐城縣志

章攀桂字華國桐城人以捐職知縣補甘肅渭原調武威鄰邑有久逋巨盜親捕獲之擢鎮江府知府調江甯

高宗純皇帝南巡議開鎮江至江甯水道攀桂奉委於攝山下故河鑿

通百里直達丹徒謂之便民新河

御舟安速而商民亦得避大江之險後以四府糧道被議仍授松太道

乞養歸

桐城縣志

金之忠字啟宗桐城人由高陽縣丞擢知玉田縣築隄禦水人稱曰金公隄升河閒同知獲武清劫盜及天津重案渠魁擢曹州知府調濟南清釐百七十餘案授宜昌府知府楚方用兵隨赴軍營辦餉團結鄉勇防堵要地略無遺誤

賞戴花翎署荆宜施道以勞卒

賜祭葬贈道銜

桐城縣志

吳逢聖字眉爽桐城舉人官興化教諭歷臺灣府知府善決疑獄多所平反不事鞭扑而情事皆實解組歸猝與洋匪船遇賊

皆曰是好官相戒弗犯而去

桐城縣志

倪企望字穎田桐城舉人知長山縣歲荒請賑盡心籌畫民不知饑飛蝗入境掩捕立盡課農桑葺邑乘爲同考官所拔多知名士移冠縣邑人請於巡撫復畱長山以老致仕歸

桐城縣志

黃良棟字晉僊桐城附監生肄業成均祭酒保薦

廷試經策以知縣用授直隸赤城署龍門調武清護府篆治績循

良祀名宦祠

桐城縣志

姚榮字香菑桐城人乾隆辛巳進士由甘肅靖遠知縣歷官至福建巡撫其知皋蘭日釋冤民張舉獲巨窩馬得鼈旋守安陸調武昌緝盜安民平反冤獄觀察汀漳嚴緝龍溪長泰劫案盜始斂跡及攝藩粵東開墾濱海沙坦千餘頃撫江西疏建豐城石隄以備旱澇至今利賴福建沿海奸民濟糧通盜乃嚴飭澳

甲坐容隱者以罪俗乃漸除所著有恭壽堂集八卷

桐城縣志

張曾敷字譽長桐城人乾隆戊子解元初官福建鹽場大使歷

廣西慶遠知府貴州貴西道宦轍所至苗民雜處曾敷本經術

爲治張弛激揚動中機要有古循吏風以母憂歸

桐城縣志

胡業宏字屺堂桐城舉人由教習知趙城縣民有訟者卽坐堂

上訊斷之日決數十案無不服其明察以病歸既歿同里有過

趙城者父老聞之喜曰此吾神君之鄉人也相與餉之間起居

聞其死皆哭失聲著有芭堂詩文集

桐城縣志

左周字逸澤桐城人乾隆己丑進士選庶常授檢討改御史晉

給事中嘗同考庚子辛丑鄉會試稱得人出爲浙江甯紹台道

理關權釐積弊署布政使猾吏利州縣侵虧有以虛領虛解高

下其手者廉得其實從嚴懲治晰款句稽遂得實數後坐失察

降調歸

桐城縣志

楊全蘊字月舫懷甯人乾隆辛卯進士知泰甯縣葺書院贈膏火親詣聚講營斃寶蓋巖寺淫僧於杖下一縣稱快城外棲鳳山有物爲祟能攝致小兒食人牲畜檄山神毆之助以火器怪遂絕以老乞休羈公事不得歸縣民日以薪米送邸舍數年卒民又請於大吏配享宋三賢祠

懷甯縣志

吳貽誠字荃石桐城人幼工詩文以貧就主簿職揀發直隸河工補交河主簿遷大城丞會尙書阿果毅勘視三灘里河隄總督命貽誠隨行事竣果毅歎爲不易才攝東安縣篆有兄弟爭訟諭以大義皆感悔泣下升知靜海葺書院增膏火邑瀕海遇旱蝗起乘其未飛募民撲之歲乃有秋踰年邑復遭水力請上憲按籍給賑存活無算改授新河令以勞卒於官

桐城縣志

張曾份字安履桐城廩貢官臨晉縣知縣調南皮遷知大興邑多貴人世家執法不撓擢順天南路同知以定水漲遄往文安護隄自夏徂秋晝夜勞憊隄得固而病作卒於官

桐城縣志

汪志伊字稼門桐城舉人充四庫全書校對議敘補山西靈石知縣升霍州知州代州民孟木成爲人誣以殺死張光裕旣定讞矣志伊訊得其冤執以爲誣木成卒得釋名由是起擢鎮江知府調蘇州晉蘇松糧道漕政肅清升江蘇按察擢甘肅布政調浙江嘉慶初以事降江西按察旋升福建布政擢巡撫五年入都疏陳漳泉積習及應辦事宜一慎選守令二責成久任三革除蠹役四整飭營伍奏入

允行以病乞歸八年病痊入都署副都御史刑部左侍郎赴江西鞠案途次

簡任江蘇巡撫洪澤湖義壩衝決亟往履勘奏請賑卹淮揚十一州縣

之被災者其秋江徐松海太被旱復請緩征賑卹民慶更生十

一年升工部尚書旋授湖廣總督自昔江漢汎溢沈浸民田或

數百年且數百里志伊泄任審其要害奏請開濬河涸出舊

田及新淤成田者數百萬畝其察江盜尤嚴法密令行根株盡

絕十五年調閩浙總督嚴治洋匪會匪擒巨盜黃治誅之降者

奏請發往黑龍江安插又嚴行懲辦天地雙刀等會宵小遠跡

二十二年以福建藩司李賡芸爲改教知縣朱履中誣訐自盡

鐫職歸

桐城縣志兼採姚鼎所作壙銘

江濟源字岷雨懷甯人乾隆戊戌進士授考功司主事晉員外

郎又晉稽勳司郎中己酉典試陝西出爲臨安府知府訟者至

呼就案與言有兄弟爭財諭以骨肉之義皆泣涕求去歲巡視

郡縣水道建水瀘江象冲塌冲三河及嶺峩貌練江多水災設
法捍禦溉田無算修葺書院勸修橋梁五六十所復義學五十
九所嘉慶二年興義苗叛募鄉勇防禦民得無恐石屏地震壓
斃四千餘人其存者爲捐廉煮粥葺棚以安集之後攝迤南道
篆引疾歸在臨安時澧社江六蓬渡有物爲災時覆人舟潯源
爲文祭神其夜大風雷鳴若有物隕墮崇竟滅著有介亭文集

筆記居暇邇言諸書祀鄉賢

懷甯縣志

韋帶字道存太湖貢生授清河教諭性情醇樸教人先德行後
文章當事重其品學請主崇實講席成就甚眾致仕歸卒年九

十

太湖縣志

劉逢奇字贊平望江舉人知豐城縣縣恃長隄爲衛王子夏水
決壞民廬舍逢奇繪圖上請修築日置身版築閒後改貴州餘

慶令署永甯州永故苗疆又遭兵燹撫綏招徠不遺餘力以勞

卒官

望江縣志

方維甸字南耦桐城人總督觀承子乾隆丙申

上巡幸山東以貢生在良鄉接

駕

特賜舉人內閣中書充軍機章京庚子成進士授吏部主事升員外郎

從征臺灣事平遷御史己酉典廣西鄉試擢給事中從征廓爾喀凱旋歷通政司副使光祿寺卿甲寅轉太常典順天鄉試乙卯知貢舉授長蘆鹽政嘉慶元年左遷刑部員外己未分校禮闈以內閣侍讀學士治軍關隴庚申出爲山東按察使辛酉授河南布政使時楚省邪匪未靖督率兵勇駐劄江岸設卡防守壬戌疏奏大功告蒞裁撤鄉勇最爲要務須在議撤官兵之前

癸亥調陝西布政擢巡撫是時零匪藏竄鄉勇未撤搜捕籌辦所繫全陝安危甚鉅丙寅甯陝鎮新募兵丁滋事急飭地方官勸諭寨民修寨自衛賊無所掠事平疏陳善後事宜皆下部議行己巳授閩浙總督剿除蔡牽餘黨洋面肅清渡臺辦理械鬪嚴法示懲疏奏班兵定例及營汛應當歸併增設之處皆照所請行旋以母老陳情歸養

恩旨俞允癸酉丁母艱值滑縣逆匪滋事奪情授直隸總督維甸疏辭卽請馳赴軍前効用奉

旨回籍守制乙亥疾卒於第

賜祭葬贈太子少保諡勤襄子傳穆

恩賜進士准其一體殿試

桐城縣志

余德洋字宗海太湖人乾隆庚子進士選庶吉士改戶部主事

舊陝中陣亡者父母存皆按冊給糧有議裁革者德洋力持不可曰我

朝以孝治天下身死王事而其親不免飢寒豈

聖主意哉議遂寢諸大臣皆趨之方擬薦用遽以疾卒年僅二十八

縣志

李長森字蔭原太湖人乾隆甲辰二甲一名進士授主事歷郎中擢御史典試河南廣西視學湖北分校禮聞皆稱得士出爲福建鹽法道調山東兵備道修學宮造海船捕蝗輯盜多善政升貴州按察晉布政以事解任授主事復出爲蘇松常鎮太督糧道革除陋規嚴治蠹棍漕法一清署江甯布政有守備陳某誣訐副將王占鼐侵蝕兵餉王幾自戕爲廉得其情事遂白其他平反冤獄多類此擢雲南布政清釐銅務安輯邊徼調福建

以親老改江甯治績如前荒政尤著乞終養歸

太湖縣志

張曾誼字正夫桐城人刑部尚書若淳子也初任廣西義甯臨桂知縣乾隆戊申征安南調赴行營辦理軍務凡他人所不敢爲者皆身任之時大學士福康安爲總統深加禮重事竣保薦聖諭嘉獎由知縣不次擢用至浙江按察使嘉慶丁巳卒於官

桐城縣志

方受疇字次耘桐城人以鹽課大使加運判揀發兩浙歷官至清河道嘉慶己未因事赴伊犁効力甲子入京授蘇松督糧道改通永道擢河南按察使調直隸升布政使癸酉巡撫浙江調河南值河漫睢州賊據滑縣整頓撫綏勤勞備至丙子總督直隸

上將如奉天值大雨灤河橋圯三日告成

溫旨褒嘉加其子烏程知縣秉知州銜庚辰

宣宗成皇帝奉

仁宗睿皇帝梓宮由熱河回京古北口至車道溝險峻難行受疇馳驅相度鑿山開道修整寬平克襄大事加太子少保銜積勞成疾陳請開缺回籍調理奉

旨俞允行至濟上卒於途遣疏上蒙

恩卹賜祭葬

桐城縣志

方觀鯉字心莊桐城人父蔡歲貢生以義行稱於鄉里觀鯉舉乾隆戊申鄉試充方略館謄錄議敘官南河東臺桃源縣丞署高泊如皋兩縣篆發奸摘伏民人感畏署山陽漕運千總縱妾凌妻至自盡漕督庇之觀鯉執法不阿觸其怒遂自請解職後擢甘泉平反江都民周氏子逆倫案明允有聲

桐城縣志

蔣振萬字虎臣懷甯人以四庫館謄錄議敘縣丞分發湖北嘉

慶元年署長陽知縣教匪偪縣所募鄉勇散守村堡振萬懷
印夜縋城出走各村糾集鄉兵有不信者以印示之遂率以擊
賊敗之又隨大兵敗賊於聶家河又焚燬王母洞賊巢渡河殺
賊無算又攻奪陳家湖及灌灣腦各處賊巢蒙

賜藍翎

並六品頂戴尋以疾卒

懷甯縣志

丁拱辰字靜齋懷甯人四庫館膳錄議敘縣丞分發湖北署歸
州判嘉慶元年募鄉兵駐新灘禦賊獲三十餘人賑濟難民記
大功三次後改發山東補惠民丞調掖縣以年老歸

懷甯縣志

江灃字蓮溪懷甯人官廣西臨桂縣六塘巡檢調宜山縣白土
司白土在萬山中猺獠所集例禁漢民竄處有廣東惠潮客民
潛入盤踞引黨剽奪猺甚苦之灃請發兵驅之出境夷民安堵

又楊某爲人所誣論大辟爲白其冤釋之

懷甯縣志

方承孟字守陬懷甯人由方略館議敘揀發雲南補河西縣典史署曲江司巡檢拉里黑土夷恃阻違抗稅吏至輒反縛沈之江承孟夜率鄉兵深入百里捕獲其酋疾馳載去己以數騎斷後追者數百至叱之曰酋已去敢動者大兵到無噍類矣眾驚愕遂巡散性敏於聽斷署布政司經歷請假便宜行事民詣司言狀者案無留牘後署廣西州五嶠州判楊家寨土夷嘯聚千餘復深入獲其渠餘諭以恩威悉感服散去大吏以卓異薦尋卒

懷甯

縣志

李豐特字西池懷甯人以縣丞借補甘肅階州吏目署紅水縣丞歲旱迫不及賑典衣借貸散給貧戶大吏嘉之委署巴燕戎格通判時昂拉等族番賊搶奪牲畜傷斃土民豐特前往宣諭番眾畏懼獻出賊首二十餘人卽實授通判歷署西甯府及安

西州事旋卒

懷甯縣志

蕭應值懷甯拔貢乾隆中官廣東瓊州知府勸農輕徭省訟釐奸建瓊臺書院人材多所造就在任十年民敬之如神明親之

若父母

瓊州府志懷甯縣志

終湖北襄安鄖道

舊選舉志新增

張黼字惠常桐城舉人乾隆中官山東汶上知縣向章殺汶壩歲費椿木薪料皆取給於民黼請官辦薪料而自捐五百金采買木植又汶民歲出軍需車輛亦請改官運及去任汶人立碑

頌德

桐城縣志樹文集

新增方東

楊世綬字金佩宿松監生江蘇巡檢乾隆乙巳大饑委辦賑務逐口親給升縣丞署丹徒知縣督數千人濬運河終江陰知縣

宿松縣志

新增

石飛熊字渭占宿松舉人乾隆中任直隸新河知縣捐廉修書

院築邑西河隄初邑有改河之議河改則新河冀州甯晉隆平坐受河患飛熊力請得寢調邯鄲詳減差徭之半洊升廣平府知府降補通判卒祀新河名宦

宿松縣志
新增

趙玉字藍生桐城人嘉慶己未進士選庶常改工部主事升郎中癸酉林逆滋事部曹星散玉至署有自署出者要與俱玉曰此何時忍言去乎人見長官長官大喜令督火藥局與兵役雜處不食三日擢知漢陽府事楚省沿江有籌備經費存於商既支用而徵息如故洲地升科復淹沒而催稅如故皆力陳大府免之辨漢川民張正豪之冤獄置黃陂逆子以極刑皆執法不徇漢陽故沃壤在任六年一無所取及歸囊橐蕭然惟書十數廚而已著有粵游燕游漢上吟諸草求己齋集及漫錄語錄諸

書

桐城縣志

姚興潔字香南桐城人乾隆乙卯湖南苗匪滋事興潔投筆從軍經略福康安奇之以理問銜檄往鳳凰廳協贊同知傅鼎軍務廳駐鎮筸爲辰沅要地苗兵突至佐鼎謀畫捍禦圍解調隨大營大功告成累擢茶陵知州興潔以苗酋雖擒兩頭洋諸寨猶未下自請隨營調鳳凰廳同知銳意擊賊遂破兩頭洋大寨上尙寨苗僞請降乘天雨直入擒其酋而歸嘉慶甲子事平戊辰擢署辰沅道辛未實授奉

旨褒嘉謂與傅鼎後先繼美卒於官苗民感之哀動山谷相率數千人赴撫署求建祠以祀巡撫以聞

上許之時傅鼎先歿乃爲祠并祀之曰二公祠

湖南通志桐城縣志

趙文楷字逸書太湖人嘉慶丙辰狀元授修撰己未疏球國請襲封奉

命賜麟服充正使持節東行五晝夜渡大洋萬餘里禮成其國厚致賂遺堅卻不受廉潔之聲著於海外舉國敬禮特爲立祠爲前使所未有既復

命旋以艱歸服闋入都出爲山西雁平兵備道以勞卒於任著有楚游稿獨秀草堂古今文其出使有槎上存稿舊志

王廷元字中和太湖人嘉慶壬戌進士知山東堂邑縣在任八年有慈君生佛之稱邑有雀成書院廷元公暇卽手所錄經義要旨一書與士子諄諄講論吏而兼師一邑懷之太湖縣志

徐之千潛山人官舒城教諭倡修學宮儀門大成殿及圍牆甬

道竹頭木屑皆爲經紀又植槐柳數百株輪囷森列今猶識其

手澤焉

舒城縣志
州府名宦

舊志廬
新移

劉國策字簡堂太湖人嘉慶甲戌進士知四川梓潼縣有聲歲

饑爲粥以食餓者不足則稱貸他邑以益之全活甚眾卒於官

民祠祀之

太湖縣志
以上舊志

徐詔字蔭村宿松舉人江西知縣任臨川捐廉助賑任永甯助書院膏火任弋陽受代去父老遮道送之稱好官云嘉慶初任

進賢卒

宿松縣志
以下新修

姚甫字勤若桐城人嘉慶初官河南商城知縣捕豪猾雪冤獄賑旱災修河隄有治績升陝州知州病歸議永惠倉積穀法籌

濟水荒饑民倡捐修理學宮皆有碑於鄉邑

桐城縣志

熊象階字松樵潛山拔貢河南知縣歷衛輝府知府在河南三

十餘年辦兵差籌荒政清廉率屬有循良第一之目

潛山縣志

曹松篁字友竺宿松進士嘉慶初官福建海澄知縣愛民禮士

修城池興水利家產皆以官盡及卒海澄人祀之

宿松縣志

丁燮字友堂懷甯拔貢嘉慶中任江蘇蕭縣教諭倡捐興復龍城書院委勘水災全活凍餒籌潘岱山泚溝二河民食其利孝子鄭立本尋父西域負骨歸葬爲請獎完娶教之讀書及告歸捐田建塾教族中子弟著有禹貢輯解

懷甯縣志

方立功字允卿桐城人由供事任甘肅土魯番巡檢善撫同民時有麴戶遏糶居奇激變之事賴立功得解升廣西全州吏目有以賄屬其杖人者拒之曰某豈鬻杖者哉立功素不輕杖人謂一受官刑辱祖先恥子孫宜慎也道光八年卒官囚號於獄士民哭於堂

桐城縣志方潛家傳

李宗傳字孝曾桐城舉人嘉慶中官浙江知縣在麗水清釐積案七百餘起在平湖出冤民毛建龍於獄山陰陳某陷朱姓以朋毆重案宗傳訊獲正凶時稱廉明道光初游授浙江糧儲道

請減漕額疏濬浙西諸水緣事降調選湖南永州府知府修濂
溪書院教民植蓄及木棉升四川成縣龍茂道議剿我邊十三
支夷匪並捐助軍需銀五千兩拾洲乎銅牛等百餘人勒交難
民無算以功卓異

簡放山東按察使應賞捕獲著名盜首擢湖北布政使告歸

桐城縣志

葉灼字仲平桐城進士河南南召知縣嘉慶初值教匪齊王氏
之亂減徭役籌軍儲城守以固署鄧州時裕州有殺人獄株連
無辜請調灼鞠訊果得其情於是兼署鄧裕二州終甘肅洮州
同知祀裕州名宦祠

桐城縣志

左德慧字石僑桐城優貢歷江蘇豐縣安徽全椒訓導終吳江
教諭訓士有法則日夕講授若爲童子師崇實學敦名節能勤
其職時以德慧與福建鄭兼才並稱二教諭

姚瑩文集
桐城縣志

郝同燮字雲士懷甯舉人初以歲貢教職署鳳陽含山廣德各

學官所至振興文教培植孤寒

懷甯縣志

張聰賢字愛濤桐城進士由庶吉士改陝西知縣先後兩任長
安縣創立義學二十餘所力行講約保甲風勵節烈濬蒼龍河
築隄岸立歲修法長安咸陽鄠民田皆免河患升補潼關廳同
知道光十一年卒官祀長安名宦祠

桐城縣志

龍鯉門字澤堂桐城進士河南知縣道光初署上蔡嚴懲奸黠
以雪冤得民心調固始訪爲民害者盡法治之升知州委勘上
蔡河隄工段以勞卒上蔡人請建祠祀之

桐城縣志

李振祐字錫民太湖進士嘉慶間由中書洊歷御史戶科給事
中奏請嚴禁考試八旗騎射替代弊端劾郎中錢學彬違例蒞
取及都察院玩視察典輒將六法之員改列供職

上俱是之補通政司參議督學山東擢內閣侍讀學士奉

諭密奏東省積弊一曰吏治叢脞二曰案牘壅滯三曰緝捕無策四曰錢糧不清又參劾東昌府知府熊方受王果並褫職道光二年遷太僕寺少卿父憂歸服闋累擢宗人府府丞奏請整頓五城捕務二十八年以安徽水災捐銀四千兩借賑下部優敘

加太子太保銜因病開缺三十年卒蒙

恩賜祭葬如例諡莊肅

史館鈔傳
太湖縣志

李振翥字雲軒太湖進士由編修知陳州府豫皖捻幅諸匪竊發振翥殲渠解脅懾不敢動以河工出力擢天津道道光壬辰水災修築隄閘遷廣東鹽運使捐建痲風院育嬰堂擢陝西按察使調山東募勇剿辦馬匪擒盜首抵罪餘黨解散積勞卒官父清樂善多義舉振翥承父志建義倉修路施渡規畫皆可久

太湖
縣志

徐鏞字詠之桐城進士由庶吉士改主事歷郎中道光三年任
福建汀州府知府興復龍山書院調浙江甯波平反於潛諸暨
巨獄守嘉興清漕案八百餘起裁規費浮收諸弊捐瘞積棺八
千餘具累擢順天府尹壬辰夏旱咨直隸總督准各屬出倉穀
糶賑復請

旨通飭清釐常平額積增建義倉

詔從之終太僕寺卿

桐城縣志

王步鼈字雲翥太湖舉人河南知縣任濬縣最久修學宮建考
舍葺祀祠立育嬰廣仁諸堂邑故患水示民宣禦之法以勞卒
官濬人祠祀之勒石以紀遺愛

太湖縣志

姚柬之字佑之桐城進士道光初任河南臨漳知縣興市肆息

訟獄承辦水災全活甚眾母憂歸起補廣東揭陽俗好仇殺攘奪戲梗賦稅束之剝平下灘匪徒置催科止關二旗親歷四鄉分別勸懲由是械鬪風息賦稅如令著有漳水圖經連州綏獠

廳志

桐城縣志

李世彬字子蔚太湖進士道光初浙江知縣母憂歸起補四川灌縣洊升知府爲政寬恕實惠及民在浙雪遂安冤獄賑富陽災黎在蜀脫巴縣死囚除合州鹽弊尤爲時所稱富陽合州均

祠祀之

太湖縣志

石綸字愚泉宿松進士歷吏部郎中道光乙酉湖南副考官壬辰甲午順天鄉試辛丑會試同考官皆破除情弊得士最盛居官未嘗干人以私清直有聲居家有義行卒祀鄉賢

宿松縣志

汪維城

味腴齋文集

何俊字亦民望江進士歷官廣西知府毀桂林九娘廟淫祠雪
象州盜案死罪五人卒獲真盜擢大名道諭民聯莊守衛匪徒
斂跡洊升江蘇布政使實心實政爲時所稱著有夢約軒詩文

集

望江縣志

方傳穉字穎齋桐城人由河南通判歷福建臺灣知府剿捕鳳
山亂民總司籌辦悉協機宜擒獲匪首解散餘黨洊擢浙江甯

紹台道

桐城縣志
卷東
紀略

姚

王之道字春如太湖進士道光初任江西鉛山知縣置鵞湖書
院膏火田數頃有慈父嚴師之頌調豐城捐廉增建隄閘以弭
河患升蓮花廳同知卒著有四湖詩文集

太湖縣志

徐峴字宇陵桐城人山西同州府經歷升鎮安知縣廉靜寡欲
多善政維持風化保衛民生著有鎮安學治錄卒祀名宦祠

桐城縣志

縣志

方心簡字在亭桐城歲貢江蘇吳江知縣道光中署無錫時海疆用兵營於惠山有擾民者心簡擒而杖之捐修吳江長橋互數十丈行道稱便目爲方公橋

桐城縣志引江蘇通志

方爲霖字壯猷桐城人湖南耒陽知縣道光十五年趙金龍之亂城守百四十餘日援至圍解城賴以全嘗鞠獄釋無辜百餘

人

桐城縣志

謝益字子遷桐城舉人河南汜水知縣道光癸卯水災親督工役開濬河道數月疏通水始歸壑民稱再生

桐城縣志

光聰諧字律原桐城進士由庶吉士改官刑部主事洊升郎中平反誣奸等案精心讀律不事請謁時人爲之語曰冷何來光聰諧道光四年授湖北荆宜施道六年江水漲沒四十八皖壽

卹災民九年隄決請銀十三萬督同荊州知府裕泰辦理工竣
稱爲光裕隄歷官直隸布政使俱稱職以疾歸前後捐貲萬數
千金置田祭祖贍族著有稼墨軒詩文集有不爲齋筆記

桐城縣志

潘光泰原名羣字掌文桐城舉人道光中貴州知縣署天柱以
卻萬金賄知名歷貴定清鎮補安平調遵義所至以培文教厚
民生爲務興水利建義學義倉義冢教民飼蠶植棉凡所建置
皆捐廉倡之在遵義首禁控狀添詞革正帖旁帖冷帖激帖諸
弊清積案七百餘起以疾歸士民攀送不絕獨無一隸胥送者
旣去民立遺愛碑卒祀貴定安平名宦祠

桐城縣志
友芝邵亭文集

徐國蘭原名坤字芷卿桐城舉人道光二十三年官績溪教諭
修學宮建考棚教民種棉紡績著有興棉說約六卷刊行以憂
歸士民立去思碑

桐城縣志

施仲鱗字輔南太湖舉人道光中歷任雲南知縣皆有治績曲靖漢回互關巡撫飭盡殄城內回民以仲鱗言獲免曲靖人尸祝之任鎮雄州殲黔匪於西里擢開化知府署昭通單騎抵回寨曉以大義護之入城斬漢練首爲民害及回民之倡亂者恩威大著以剿辦蜀滇黔接壤土匪功卽補道員卒昭通民請祀名宦祠

太湖縣志

王用賓字禮之懷甯進士江蘇儀徵知縣捕治沙漫洲盜江面肅清請淮南引鹽仍至儀徵改捆民食其利道光辛卯大水設棚賑粥及春籌給牛種訊斷明敏無宿獄累官江西吉安知府卒

懷甯縣志

潘政舉字樹人懷甯進士道光中陝西知縣善決疑獄所在有惠政署佛坪同知倡修學宮籌增膏火暑咸甯嚴治教匪剴諭

夏民調補大荔和輯漢同刀匪斂跡升郿州知州卒官

懷甯縣志

汪先烜字鶴之桐城進士咸豐初由主事改貴州知縣以軍功

升獨山知州署綏陽縣迭次捐資募勇會戰悍寇力保危城十

一年署仁懷廳卒官

桐城縣志

程汝霖字敬亭潛山人廣東澄海縣梓林巡檢平外沙村奸民

之亂洊升知縣署平遠擒治大猾調普甯龍門剿山賊有功

潛山志

縣志

儲敷恩字初旃潛山人貴州典史委辦思南紅絲塘苗案爲除

苛禁立義學義田安輯教養之攝鎮遠縣丞時邛水苗多劫案

親入苗寨諭解首亂二十六人以獻

潛山縣志

李仙根字翠含太湖歲貢署無爲州學正疏濬黃絲灘修築貓

山下隄民慶安瀾署霍邱學宮傾圯倡捐移建又倣范氏義莊

捐田贍族

太湖縣志

方木生字治鋒太湖進士刑部主事擢員外郎總辦秋審處精心釐剔雖除日無休沐暇性彊直意所不可輒侃侃爭上官不

能奪

太湖縣志

徐引字觀藻宿松進士廣西馬平知縣擒逆首韋扶果升署思恩知府肅清二匪圖僞翼逆石達開之弟石鎮吉於安定土司境內擒之并殲其家屬餘黨以母憂去官卒

宿松縣志

孫起端字心筠桐城進士選庶吉士道光初改主事累擢給事中稽查天津倉儲上疏極陳漕運之弊尋授貴州糧道廉以自奉罷所屬府州歲供復義學尚節堂詳立規制署按察使出謫坐死囚平反成獄之輕重失當者會粵寇初起上書巡撫言黔粵唇齒宜練兵奏請赴粵合剿不能用咸豐元年卒官

桐城縣志

姚瑩字石甫桐城進士嘉慶十九年選福建平和知縣調龍溪甚有威惠士民畏愛之調臺灣毀五妖像署噶瑪蘭通判獲巨盜林牛等緣事降調道光十年起江蘇知縣歷元和武進督修孟瀆三河累擢淮南監掣同知升署福建臺灣道

諭曰臺灣爲海口要區非熟悉情形才守兼優之員不足以資表率淮南監掣同知姚瑩前經陶澍等保舉朕於召見時察其才具明白諳練曾任臺灣知縣噶瑪蘭通判於該處情形較爲熟悉著升署臺灣道并賞加按察使銜十八年任事擒獲嘉彰賊胡布等二十年洋船窺伺臺灣二十一年再犯雞籠均擊敗之並剿平南北兩路逆匪疊奉

諭旨嘉獎賞戴花翎給雲騎尉世職二十二年復破之於臺港奉有旨勇兼施不負委任之

諭賞加二品頂戴仍交部優敘會撫議成被劾逮問下詔獄凡十二日

而出發往四川補蓬州知州告歸三十年

文宗硃

諭姚瑩前在臺灣盡忠盡力等因授湖北鹽法道馳驛廣西參

贊尙阿軍務尋擢廣西按察使圖滅賊六策力請斷賊外援咸

豐二年畱署湖南按察使卒官著有東溟奏稿文集詩集東槎

紀略康輶紀行寸陰叢錄識小錄姚氏先德傳都八十九卷

縣志

方鴻猷字怡青桐城人江蘇婁縣巡檢所駐南接浙江嘉興有

巨盜顧雙喜沈阿三聚眾剽掠屢捕不獲檄鴻猷會剿鴻猷請

先往諭以大義咸感激解散又倡建永豐倉全節育嬰救生掩

埋諸堂局後水災居民賴永豐以活

桐城縣志

張寅字子畏桐城進士戶部主事歷郎中授江西九江府知府

調南昌修城垣建義倉增洪都書院膏火倡捐修築豐城江隄

尋以原品休致

桐城縣志

馬培章字星甫桐城副貢浙江青村場大使梟犯滕攀等爲亂斬平之升知縣歷奉化蕭山去任後民閒勒石有廉平不苛是

眞父母之頌著有晚晴詩鈔

桐城縣志

張傳敬字慎修桐城人由供事官福建巡檢洊升知縣歷古田

臺灣嘉義彰化並得民心任鳳山時會匪圍城傳敬激勵士民

竭力防剿擊走之調辦臺灣善後卒

桐城縣志

汪維城字省吾宿松舉人道光時官青陽訓導得士民心饑民

求賑洵洵一言而解咸豐初元舉孝廉方正父憂去官胡林翼

奏調湖北知縣署松滋潔己愛民有造士息訟闡幽表節築隄

救災團練弭亂諸善政保同知直隸州卒祀松滋名宦祠著有

歷朝節義錄讀史卮言味腴齋文集稼圃叢言經韻參考辨正

宿松縣志

王璪字魯園懷甯人高祖以下五世同居璪事親以孝聞成道光壬辰進士官戶部二十餘年由主事洊升郎中有廉名咸豐四年授湖南寶慶知府署衡州知府禦粵逆靖升民以教養爲務告歸泣送者數千人璪長子希杰優貢懷遠訓導咸豐初襄辦饑賑勸捐團練同文生金照普武生常元確率勇援鳳陽與髮賊夾渦而軍擊斃百餘人累禦捻逆擊走之遷壽州學正士民送者數十里璪次子支蟠舉人直隸高陽知縣有政績

懷甯縣志

金達字斗生桐城諸生議敘訓導軍功知府同治五年補湖北鄖陽捐賑水災修築城隍興復書院請增鄉試鄖字號中額一名士民稱頌之卒官

桐城縣志

金承詔字蔭亭桐城人官直隸蘆台場大使以獲私販銅鐵出海人犯升知縣歷交河邯鄲及署磁州皆有聲憂歸起補河南夏邑調武陟時黃沁河漲隄危甚承詔資購石木親當險工救護以是獲安及粵逆竄懷慶倡募勇丁親督防剿洊升道員告

歸桐城縣
呈冊